


INFO



Informativni časopis Općine Novi Grad Sarajevo | juli 2020. godina | Broj 26

OSAM NOVIH IGRALIŠTA U NOVOM GRADU








CENTAR SAFET ZAJKO

REKREACIJA, SPORT I EDUKACIJA



SADRŽAJ:

	Općinsko vijeće.....	4
	Kabinet načelnika.....	12
	Privreda.....	14
	Infrastruktura.....	18
	Obrazovanje.....	42
	Kultura.....	44
	Obilježavanja.....	47
	Ostale vijesti.....	52
	Civilna zaštita.....	56

TELEFONI ZA HITNE INTERVENCIJE:

HIGIJENSKI SERVIS
+ 387 61 22 99 40

DEŽURNI INSPEKTOR
+ 387 61 22 99 49

IMPRESUM:

IZDAVAČ:

Općina Novi Grad Sarajevo
Tel.+387 33 291 100, 291-313
E-mail: ngsabih.net.ba
www.novigradsarajevo.ba

AUTOR I UREDNIK:
GRAFIČKI UREDNIK:
FOTOGRAFIJA:

Amina Vatreš-Nezirević
Vahidin-Nino Pršeš
Samir Kadić

VAŽNIJI TELEFONI I E-MAIL ADRESE

Služba za poslove Općinskog vijeća

033 291-130, fax. 033 291-271
vijece@novigradsarajevo.ba

Služba kabineta Općinskog načelnika

033 291-100 033 291-103; fax. 033 291-278
infonovigrad@novigradsarajevo.ba
ngsa@bih.net.ba
aminapress@novigradsarajevo.ba

Služba za privredu i lokalni ekonomski razvoj

033 291-122
privreda@novigradsarajevo.ba

Služba za urbanizam, imovinskopravne, geodetske poslove i katastar nekretnina

033 291-120; fax. 033 291-224
urbanizam@novigradsarajevo.ba
033 291-279
imovinska@novigradsarajevo.ba

Služba za opću upravu

033 291-233;
opcauprava@novigradsarajevo.ba
maticniured@novigradsarajevo.ba
cern@novigradsarajevo.ba

Služba za obrazovanje, kulturu i sport

033 291 117
033 291 281; fax. 291 170
obrazovanjeirazvoj@novigradsarajevo.ba

Služba za boračka pitanja, rad, socijalna pitanja i zdravstvo

291-237; fax.291-164
boracka@novigradsarajevo.ba
033 291-173; fax. 291-173
radisocijalnapitanja@novigradsarajevo.ba
291-306; fax.291-281

Služba za investicije i infrastrukturu

033 291-116
investicijeikomunalno@novigradsarajevo.ba

Služba za finansije

291-234; fax.291-319
finansije@novigradsarajevo.ba
ngsafin@bih.net.ba

Služba za zajedničke poslove

033 291-107
sacira@novigradsarajevo.ba

Služba civilne zaštite

033 291-114
cz@novigradsarajevo.ba

Služba za lokalnu samoupravu

033 291-344
mz@novigradsarajevo.ba

Služba za inspekcijske poslove

inspekcija@novigradsarajevo.ba

Pravobranilaštvo Općine Novi Grad Sarajevo

033 291-162
pravobranilastvo@novigradsarajevo.ba





U prošloj godini prepolovljen broj ukradenih automobila

Općinsko vijeće Novi Grad Sarajevo, na sjednici održanoj 27. februara, između ostalog je razmatralo informaciju o stanju sigurnosti i aktivnostima Četvrte policijske uprave u 2019. godini sa uporednim pokazateljima iz 2018. godine. Od Ministarstva unutrašnjih poslova Kantona Sarajevo, i ovoga puta je zatraženo hitno popunjavanje jedne trećine nedostajućih službenika u Četvrtoj PU.

Istaknuta je potreba za povećanjem broja policijskih struktura na određenim mikro-lokalitetima, kao i prisustvo većeg broja policijskih službenika u blizini osnovnih škola i na drugim javnim mjestima. Vijećnici su se interesirali i o tome šta policija čini po pitanju sprečavanja nelegalne prodaje na gradskim saobraćajnicama, koju vrše migranti, a čime se ometa odvijanje saobraćaja i narušava sigurnost učesnika u saobraćaju. Rečeno je da PU Novi Grad duži vremenski period radi sa 30 posto manje policijskih službenika, te da teritorijalno "pokriva" najveći dio Sarajevskog kantona. Međutim, i pored toga, procenat rasvijetljenosti krivičnih djela

na nivou Kantona Sarajevo i dalje je najveći na području Novog Grada (55,45%), te da se stanje u oblasti kriminaliteta na području općine Novi Grad može ocijeniti zadovoljavajućim.

Načelnik PU Novi Grad Idriz Efendić u svom izlaganju je kazao da su policijski službenici Četvrte PU radili na podizanju nivoa sigurnosti za sve građane u našoj općini. "Što se tiče kriminaliteta, neznatno je došlo do povećanja izvršenja krivičnih djela, a procenat otkrivenosti počinitelja krivičnih djela je veći od 55 posto. U 2019. godini došlo je do smanjenja broja otuđenih vozila sa 67 na 37 (44,78%). Što se tiče javnog reda i mira, pratili smo i analizirali stanje, kao i vozila GRAS-a i Centrotransa, kako uposlenike tako i putnike, da bi spriječili pojavu sigurnosnih problema. Sprečavali smo i prosjačenje na ulicama, bespravnu uličnu prodaju, obilazili objekte u kojima se okupljaju lica sklona narušavanju javnog reda i mira", kazao je Efendić.



Načelnik PU Novi Grad
Idriz Efendić



Osigurana sredstva za civilnu zaštitu i domove zdravlja, zakupci poslovnih prostora oslobođeni plaćanja



Zbog epidemiološkog stanja u kojem se našla naša zemlja, kao i druge države u svijetu, Općinsko vijeće Novi Grad Sarajevo održalo je, 28. marta, vanrednu sjednicu, na kojoj je, po hitnoj proceduri i jednoglasno, usvojilo Izmjene i dopune budžeta za 2020. godinu. I ostale tačke dnevnog reda koje su se našle na sjednici, a odnose se na lakše prevazi- laženje posljedica pandemije, vijećnici su jednoglasno usvojili.

Izmjenama i dopunama budžeta osigurana su tri miliona konvertibilnih maraka za pre- venciju širenja koronavirusa i brobu proitv posljedica uzrokovanih pandemijom. Od toga je milion i po konvertibilnih maraka osiguran za materijalno - tehnička sredstva i aktivnosti Civilne zaštite, Doma zdravlja "Novi Grad" i drugih ustanova uključenih u prevenciju i borbu protiv koronavirusa na prostoru općine Novi Grad Sarajevo. Pola miliona konvertibilnih maraka izdvojeno je za rezervne zalihe prehrambenih proizvoda

za potrebe Civilne zaštite u slučaju da dođe do situacije da jednom broju stanovništva bude trebalo obezbijediti osnovne životne namirnice ili ukoliko bude potrebe da se formiraju izolatoriji za veći broj stanovnika, koji će također imati potrebu za hranom. Služba civilne zaštite ranije je naručila oko 2.000 paketa sa prehrambenim artiklima koje bi Štab CZ imao na raspolaganju za slučaj potrebe, obzirom da Općina Novi Grad ima oko 130.000 stanovnika.

Podsticajne mjere za privredu i razvoj poljoprivrede

950.000 KM osigurano je za provođenje pod- sticajnih mjera razvoja i rasterećenja privrede i razvoja poljoprivredne proizvodnje, tekući transfer za podsticaj razvoja poljoprivredne proizvodnje, sa ranije planiranih 160.000 KM

uvećan je za dodatnih 340.000 KM, dok su sredstva za projekte obuke, prekvalifikacije i zapošljavanja radnika za deficitarna zama- nja uvećana za 350.000 KM, a sredstva za sufinansiranje početnika u biznisu povećana

su za 260.000 KM u odnosu na prethodno planirana.

Također, izdvojeno je i stotinu hiljada KM za podršku Ministarstvu civilnih poslova u rje- šavanju problema migranata.



Pored izmjena i dopuna budžeta, koje su potrebne da bi Civilna zaštita nastavila sa provođenjem mjera zaštite stanovništva od koronavirusa, Općinsko vijeće donijelo je odluku kojom se poslovni subjekti koji iznajmljuju prostor od Općine Novi Grad, a čiji rad je prekinut proglašenjem prirodne i druge nesreće, oslobađaju plaćanja zakupnine, za period obustave rada.



Zapošljavanje nedostajućeg medicinskog kadra po hitnoj proceduri

Vijeće je usvojilo zaključak kojeg je ranije utvrdio Štab civilne zaštite, a kojim se od Vlade Kantona Sarajevo traži da pronađe način da po hitnoj proceduri uposli nedostajući kadar u Javnoj ustanovi Dom zdravlja KS – Organizaciona jedinica DZ „Novi Grad“, koji je najveći dom zdravlja u Bosni i Hercegovini i opslužuje najveći broj stanovnika, a koji već

duži period ima problema sa nedostatkom medicinskog kadra.

Vijeće je usvojilo i izmjene Poslovnika o radu Općinskog vijeća, kojima je omogućeno da se u vanrednim okolnostima sjednice vijeća mogu održavati telefonski ili online.

Vijećnicima je prezentirana i informacija o

poduzetim aktivnostima i preventivnim mjerama zaštite i spasavanja stanovništva na području općine Novi Grad, za period od donošenja Odluke o proglašenju stanja prirodne i druge nesreće uzrokovane pojavom koronavirusa.



Pohvale Civilnoj zaštiti za organiziranost i rad u vrijeme prirodne nesreće

Uz podršku velike većine vijećnika, Općinsko vijeće Novi Grad Sarajevo na 33. sjednici, 04. juna, usvojilo je Izvještaj o izvršenju budžeta i godišnji obračun Općine Novi Grad Sarajevo za 2019. godinu. Izvršenje prihoda u prošloj godini ostvareno je u procentu od 99,66 posto, i ocijenjeno je izuzetno uspješnim i najbolje ostvarenim rezultataom u periodu nakon rata.

Najviše pažnje vijećnici su posvetili Informaciji o provedenim aktivnostima i preventivnim mjerama na sprečavanju širenja koronavirusa i zaštite zdravlja stanovništva u vrijeme proglašenja stanja prirodne i druge nesreće. Vijeće je upotpunosti podržalo sve aktivnosti koje je provela Civilna zaštita i pohvalilo rad Štaba CZ, Službe CZ i svih drugih službi koje su dale doprinos u prevazilaženju stanja uzrokovanog pandemijom koronavirusa.

Većina vijećnika pohvalila je način organizacije Civilne zaštite, imenovanje povjerenika u svim mjesnim zajednicama, vršenje stalne i kontinuirane dezinfekcije svih dijelova Novog Grada, ali i podrške ustanovama koje su bile na prvoj liniji borbe protiv koronavirusa.

„Lijepo je bilo svjedočiti jednoj situaciji gdje su svi vijećnici, bez obzira na političku pripadnost, prepoznali i dali pohvale radu Civilne zaštite Općine Novi Grad u periodu pandemije. Pohvalili su i mjere podrške privredi u prevazilaženju posljedica uzrokovanih pandemijom koronavirusa, i one mjere koje se tiču davanja na besplatno korištenje poljoprivrednog zemljišta našim građanima za poljoprivredne svrhe. Nadam se da ćemo u ovakvom tonu i druge pozitivne aktivnosti uspjeti da realiziramo“, kazao je općinski načelnik Semir Efendić.



Direktor Doma zdravlja "Novi Grad"
dr. Abel Baltić



Vijećnica OV Novi Grad Sarajevo
Enisa Spahić



Zamjenik predsjedavajućeg
OV Novi Grad Sarajevo
Elvis Hodžić

Podrška Domu zdravlja

Sjednici je prisustvovao i direktor Doma zdravlja „Novi Grad“ dr. Abel Baltić koji je prisutne informisao o aktivnostima koje su uz podršku Općine provedene kako bi broj zaraženih stanovnika općine Novi Grad bio sveden na minimum.

U svom izlaganju dr. Baltić iskazao je zahvalnost Općini Novi Grad koja je promptno reagovala i osigurala neophodnu zaštitnu opremu, dezinfekciona sredstva i drugu materijalno - tehničku opremu, koju ova zdravstvena ustanova, koja je ujedno i najveći dom zdravlja u BiH, nije imala u vrijeme pojave pandemije u Kantonu Sarajevo.

Također je kazao da, zahvaljujući brznoj reakciji Civilne zaštite i uposlenika Doma zdravlja, niti jedan uposlenik Doma zdravlja nije bio zaražen u tom periodu, iako je ljekarski tim radio sa znatno manjim kapacitetima od potrebnih. Istakao je i činjenicu da Dom zdravlja „Novi Grad“ opslužuje potrebe oko 130.000 stanovnika, te da ovoj ustanovi, na osnovu broja pacijenata, nedostaje još 160 uposlenika. Naglasio je da umjesto 61 doktora porodične medicine trenutno radi 29, tako da jedan doktor, u prosjeku, dnevno primi 120 pacijenata.

Tokom sjednice naglašen je problem o kojem će se održati posebna press konferencija,

a tiče se upravo nedostatka kadra u Domu zdravlja „Novi Grad“, koji je alarmantan već duži vremenski period. Obzirom na to da je Općinsko vijeće sa vanredne sjednice 28. marta, uputilo zaključak Vladi Kantona Sarajevo kojim traži da pronađe način da po hitnoj proceduri uposli nedostajući kadar u JU Dom zdravlja KS, te da do sada nema reakcije od nadležnih institucija Kantona, Ministarstva zdravstva, zaključeno je da se mora poduzeti nešto da se to stanje hitno promijeni, jer ono može ugroziti zdravlje stanovništva kako je to učinila i sama pandemija.



Poslovni subjekti oslobođeni plaćanja zakupnine za protekla dva i po mjeseca

Vijeće je donijelo Odluku o načinu obračuna i plaćanja zakupnina za korištenje poslovnih prostora i skloništa Općine Novi Grad Sarajevo u vrijeme proglašenja stanja prirodne i druge nesreće, kojom se zakupci poslovnih prostora i skloništa kojima je naredbom Štabova civilne

zaštite bio zabranjen ili otežan rad, oslobađaju plaćanja zakupnine za protekla dva i po mjeseca, tačnije od proglašenja vanrednog stanja, 17. marta do 31. maja tekuće godine. Ova Odluka odnosi se na ugostiteljske, trgovačke i obrtničke djelatnosti, zatim frizerske

i kozmetičke salone i druge uslužne djelatnosti. Plaćanja zakupnine za protekla dva mjeseca oslobođeni su i poslovni subjekti koji su u aprilu i maju imali pad prometa preko 40 posto.



„Zlatna plaketa odbrane općine Novi Grad Sarajevo“ posthumno „Zlatnom ljiljanu“ Muzaferu Mešiću

Jednoglasno je donesena Odluka o dodjeli općinskih priznanja pojedinačne i kolektivne „Zlatne plakete odbrane općine Novi Grad Sarajevo“.

Vijeće je donijelo Odluku da se pojedinačna „Zlatna plaketa odbrane općine Novi Grad Sarajevo“ posthumno dodijeli rahmetli Muzaferu Mešiću, komandantu 1. bataljona 2. Viteške motorizovane brigade, dobitniku najvišeg ratnog priznanja „Zlatni ljiljan“, za izuzetne zasluge u odbrani općine Novi Grad Sarajevo i BiH u odbrambeno - oslobodilačkom ratu.

Zlatna plaketa odbrane općine Novi Grad“ bit će dodijeljena Muazu Suljagiću, komandantu 3. motorizovanog bataljona 2. Viteške

motorizovane brigade za izuzetne zasluge u odbrani općine Novi Grad Sarajevo i Bosne i Hercegovine u odbrambeno - oslobodilačkom ratu 1992-1995. godine.

Kolektivna „Zlatna plaketa odbrane općine Novi Grad Sarajevo“ dodijeljena je Odredu Teritorijalne odbrane Mojnilo. Odred Mojnilo formiran je od grupa i dobrovoljaca brda Mojnilo na samom početku suprotstavljanja agresiji bivše JNA i srpsko-crnogorskog agresora s ciljem zaštite naselja i najgušće naseljenog dijela Novog Grada i odbrane Sarajeva i Bosne i Hercegovine. Zona djelovanja odreda Mojnilo bila je od spoja ulice Milinkladska – Vrbovska do kuća Trapara na cesti Lukavica – Dobrinja. Odred je brojao 1.150 boraca raspoređenih u devet četa,

a bio je među prvim jedinicama TO koja se suprotstavila agresoru i zaslužan je za odbranu vodovoda Mojnilo.

Na sjednici je usvojen i Izvještaj o utrošku sredstava boračkih udruženja za odobrene projekte januar – decembar 2019. godine sa mišljenjem Službe za boračka pitanja, rad, socijalna pitanja i zdravstvo, kao i Izvještaj o utrošku odobrenih sredstava za podršku održivom povratku raseljenih lica u 2019. godini, te Program obilježavanja značajnih datuma, ličnosti i događaja iz perioda odbrambeno - oslobodilačkog rata 1992-1995 i NOR-a 1941-1945 u 2020. godini.

Općinsko vijeće Novi Grad usvojilo godišnji izvještaj JP „Lokom”

Općinsko vijeće Novi Grad Sarajevo, na sjednici održanoj 25. juna, razmatralo je i usvojilo izvještaj o radu i finansijskom poslovanju Javnog preduzeća „Lokom” d.o.o., koje je u prošloj godini ostvarilo najveći promet od osnivanja u iznosu od 3,2 miliona konvertibilnih maraka.

Prihod ovog preduzeća i Veterinarske stanice, koja posluje u sklopu njega je 2 miliona KM, dok se 1,2 miliona KM odnose na poslove iz prenesene nadležnosti, koje obavlja za Općinu.

Vijećnici su pohvalili rad ovog preduzeća i napredak u radu i razvoju. Istaknuta je činjenica da je JP „Lokom” prije svega osnovan radi upravljanja i održavanja sportskih i kulturnih objekata u vlasništvu Općine, ali da je na putu svoga razvoja i djelovanja znatno proširio djelatnosti rada, posebno u oblasti komunalnih aktivnosti.

Objekte koje održava i kojima upravlja ovo preduzeće u prošloj godini je posjetilo više od pola miliona građana. Osim što upravlja i održava sportske objekte i sportske terene, među kojima i stadion Otoka, „Lokom” tokom

24 sata obezbjeđuje sve objekte i parkinge kojima upravlja. Radi i određene komunalne poslove, kao što su održavanje spomen-obilježja, hair česmi, fontana, lokalnih vodovoda i sl. a od prošle godine i sanaciju udarnih rupa na lokalnim saobraćajnicama. U prošloj godini sanirali su 620 udarnih rupa, odnosno 4.118 metara kvadratnih ulica.

Vijećnici su istakli da je to jedno od rijetkih javnih preduzeća u Kantonu Sarajevo koje posluje sa dobitkom, a ako se u obzir uzme činjenica da je 2012. godinu završilo sa gubitkom od 111.379 KM, može se sa sigurnošću kazati da je prethodna godina bila rekordna po ostvarenim prihodima.

Također je rečeno da je preduzeće putem Veterinarske stanice odigralo najvažniju ulogu u borbi sa problemom pasa lualica u Kantonu Sarajevo. To je jedina Veterinarska stanica koja trenutno radi taj dio posla u Kantonu Sarajevo, opslužuje Higijenski servis Novog Grada i Higijenski servis JP „Rad”.

Posebna pažnja posvećena je aktivnostima poljoprivrednog proizvodno - edukativnog poligona na Mojmilu i razvoja poljoprivredne

proizvodnje na području općine Novi Grad, na kojem su u protekloj godini proizvedene velike količine hrane, i data osnovna znanja građanima koji se žele baviti poljoprivrednom proizvodnjom.

„Širok spektar aktivnosti je bio u 2019. godini, samim tim što je dvotrećinska većina vijećnika podržala izvještaj o radu preduzeća u prošloj godini, govori da je preduzeće kvalitetno obavilo svoj posao. Imamo dobre rezultate u 2019. godini, a 2020. godina nam je u samom startu sa koronavirusom postavila značajne izazove. Prije svega, zato što je jedan od glavnih zadataka „Lokom-a” organizovanje sportskih terena i sportskih dvorana na području općine Novi Grad, a sport u ovome vremenu nije gotovo ni radio, niti je imao svojih aktivnosti, tako da će 2020. godina biti vrlo izazovna”, kazao je Emir Dedović, pomoćnik načelnika za finansije Općine Novi Grad.

Vijeće je također jednoglasno usvojilo zaključak kojim se zadužuju općinske službe da u narednom periodu pripreme revidiranu strategiju i viziju poslovanja JP „Lokom” u skladu sa trenutnim i budućim djelovanjem.





Usvojen program rekonstrukcije cesta za ovu godinu

Općinsko vijeće Novi Grad Sarajevo usvojilo je program rekonstrukcije, održavanja i popravke ulica i lokalnih i nekategorisanih cesta. Za tu namjenu u općinskom budžetu planirano je 1.170.000 KM, dok je za redovno ljetnje održavanje cesta i izradu i obnovu saobraćajne signalizacije izdvojeno 330.000 KM, što je ukupno 1,5 miliona KM.

Programom investicionog održavanja i rekonstrukcije cesta planirano je asfaltiranje i sanacija 20 ulica, koje će se raditi na širem prostoru Novog Grada, a vijeće je usvojilo i rezervnu listu za sanaciju još 10 ulica.

Ovogodišnjim programom osim asfaltiranja i sanacije oštećenih cesta, asfaltirat će se i veliki broj ulica koje do sada nisu imale asfalt, kao što su Butilska od br. 19 do 37, zatim dio Butilske ulice od broja 111 do broja 147, sanacija ulica Mihaljevska do broja 133 i Paljevska do broja 302, u mjesnoj zajednici „Dobroševići“.

Rezervna lista za sanaciju deset ulica

Rezervnom listom predviđena je izgradnja pristupnog puta u ulici Vrbovska čikma od broja 27 prema objektu OŠ „Aneks“, te sanacija potpornog zida u Cazinskoj ulici kod broja 40, na Aneksu, kao i sanacija i asfaltiranje neasfaltiranog dijela ulice Vladimira Preloga od broja 127 do broja 131, u Buća Potoku, te makadamskog dijela ulice Doljanska od

U naselju Zabrđe prvi put će biti asfaltirani dijelovi ulice Porodice Zimić od broja 11 do spoja sa ulicom Porodice Šehić, kao i dio ulice gazi Mehmed-paše Fidahića od broja 27 do broja 19, i do spoja sa ulicom Safeta Zajke.

U naselju Briješće planirana je sanacija dijela ulice Izeta Karšića, gdje će se izvršiti proširivanje ceste i izgraditi trotoar, također će se, po prvi put, asfaltirati i dio ulice Briješće brdo od broja 148D.

Planirana je sanacija i asfaltiranje dijela ulice Bana Borića od broja 62 do broja 74, kao i dijela ulice Ragiba Džinde od broja 224 do broja 232, te dijela ulice Ragiba Džinde čikma od broja 166 do broja 206, i kraka te ulice, u mjesnoj zajednici „Alipašin Most-1“, dok će se u MZ „Alipašin Most-2“, tačnije u ulici Kasima Hadžića do broja 111, uraditi sanacija potpornog zida koji je u jako lošem stanju i obrušava se na saobraćajnicu.

broja 3 do broja 15 i spoja ulica Šehidska i Doljanska, u Dobroševićima, kao i ulice Avde Palića od broja 267 do broja 267D i Zaima Imamovića od broja 86G do broja 90, u naselju Zabrđe.

U naselju Briješće planirana je sanacija i asfaltiranje dijela ulice Vrandučka broj 51, a u ulici Mehmeda Arapčića kod broja 43

U mjesnoj zajednici „Buća Potok“ u planu je asfaltiranje neasfaltiranog dijela ulice Adema Buće od broja 225 do broja 235, kao i ulice Asima Čamdžića od broja 3 do spoja sa ulicom Adema Buće, gdje je predviđena izgradnja potpornog zida uz saobraćajnicu. Sanacija i asfaltiranje neasfaltiranog dijela ulice Derviša Sude Vražalice od broja 25, kao i proširivanje pristupnog puta prema školi „Avdo Smailović“ radit će se u MZ „Dolac“.

U naselju Aneks uradit će se sanacija oštećenog dijela ulice Velikokladuška od broja 23 do broja 11, a u Švrakinom Selu dijela ulice Ali-bega Firdusa čikma od broja 23 do broja 1 i dijela ulice Rasima Turkušića, kojom se odvija javni gradski prevoz. U mjesnoj zajednici „Dobrinja A“ planirano je asfaltiranje dijela ulice Branislava Nušića od broja 135D do broja 135.

izgradnja potpornog zida i pristupnog puta do spoja sa ulicom Briješće Brdo. Izgradnja potpornog zida planirana je u ulici Smaila Šikala do broja 168 u Boljakovom Potoku.

Za sanaciju i asfaltiranje 28 ulica iz prošlogodišnjeg budžeta Općina Novi Grad Sarajevo izdvojila je 1.286.000 KM.




JP „Lokom“ nastavlja sanaciju udarnih rupa

Javno preduzeće „Lokom“ nastavit će i u ovoj godini raditi sanaciju udarnih rupa i drugih oštećenja na novogradskim ulicama, u sklopu redovnog ljetnjeg održavanja cesta. U prošloj godini ekipe održavanja cesta ovog preduzeća, za pet mjeseci sanirale su oko 4.000 metara kvadratnih udarnih rupa i prokopa, u šta je ugrađeno oko 570 tona asfalta.


Ovakav način rada sanacije oštećenja na lokalnim cestama pokazao se znatno bržim i efikasnijim, od ustaljenog modela po kojem je sanacija oštećenja na ulicama rađena ranijih godina, tj. odabirom firmi putem javnih nabavki, koje nisu adekvatno odgovorile zahtjevima Općine.

Za nabavku repromaterijala i ostale troškove za sanaciju udarnih rupa i oštećenja na saobraćajnicama koja će se raditi u ovoj godini, izdvojena su sredstva u iznosu od 230.000 KM.





Načelnik Efendić učesnik panel-diskusije Robert Schuman Instituta (RSI)



Načelnik Općine Novi Grad Semir Efendić bio je jedan od učesnika online panel-diskusije o temi "Odgovor načelnika na društvene, ekonomske i zajedničke izazove", u organizaciji Robert Schuman Instituta (RSI).

Pored načelnika Efendića, učesnici panel-diskusije bili su Ingeborg ter Laak iz Holandije, vijećnica u općini Zoetermeer i Elisabet Laan, zamjenica gradonačelnika Geteborga u Švedskoj.

Prisutne je pozdravila i Doris Pack, predsjednica Robert Schuman Instituta i nekadašnja članica Evropskog parlamenta, a okruglim stolom je moderirala Raluca Norel iz Belgije koja je zadužena za press i komunikaciju unutar EPP grupacije u Evropskom komitetu regija.

Sa svojim pitanjima učešće su uzeli i polaznici Robert Schuman programa iz Sjeverne Makedonije, Rumunije, Armenije, Albanije, Srbije, Ukrajine, Mađarske, Belgije, Holandije i Bosne i Hercegovine.

Pandemija koronavirusa nije opasna samo po zdravlje stanovnika, već sa sobom donosi socijalne i ekonomske krize. Učesnici panel-diskusije su razmijenili mišljenja i iskustva o odgovoru na krizu uzrokovanu pandemijom.

Načelnici sarajevske općine Novi Grad i istanbulske općine Beyoğlu Efendić i Yildis razgovarali o nastavku saradnje

Načelnik Općine Novi Grad Sarajevo Semir Efendić i načelnik istanbulske Općine Beyoğlu, Haydar Ali Yildis, održali su sastanak putem video linka.

Beyoğlu je centralna općina Istanbula u kojoj živi oko 250.000 stanovnika i jedna je od najrazvijenijih u Republici Turskoj. Načelnik Yildis, koji od 2016. godine rukovodi Općinom Beyoğlu, izrazio je želju da ostvari kontakt sa načelnikom najveće i najmlađe Općine u Sarajevu i Bosni i Hercegovini Semirom Efendićem.

Razmijenili su iskustva i razgovarali o aktuelnoj situaciji koja je uzrokovana pandemijom koronavirusa i poduzetim mjerama i aktivnostima na prevazilaženju ekonomskih i drugih posljedica uzrokovanih pandemijom. Načelnici su istakli da je pandemija usporila planove i projekte čija se realizacija očekivala u martu i aprilu, te su izrazili nadu da će se realizovati u narednom periodu.

Spomenuli su i predstojeće historijski važne datume koji se obilježavaju u julu, 11. juli i 15. juli, koji su značajni za ova dva naroda, te su jedan drugom uputili izraze saosjećanja. Načelnik Efendić je tom prilikom podsjetio na genocid koji je počinjen u Srebrenici, a načelnik Yildis na vojni udar u Turskoj koji se dogodio 2016. godine.

Dogovorili su da će u narednom periodu nastaviti ranije započetu saradnju koja je ozvaničena u julu 2014. godine potpisivanjem sporazuma o zajedničkoj saradnji dvije općine u oblastima kulture, obrazovanja, ekonomskog i razvoja turizma.



APEL VLASTIMA KS:

Hitno zaposliti nedostajući medicinski kadar i izmijeniti zakon kojim bi se domovi zdravlja dali općinama na upravljanje

U Općini Novi Grad Sarajevo, 10. juna, održana je zajednička press konferencija predstavnika Općine, Doma zdravlja "Novi Grad" i klubova vijećnika Općinskog vijeća Novi Grad na kojoj je, po ko zna koji put ukazano na višegodišnji problem nedostataka medicinskog kadra u JU Dom zdravlja KS, koji je najizraženiji u Organizacionoj jedinici Dom zdravlja "Novi Grad", a zbog čega najviše trpe naši građani, koji nemaju adekvatno pruženu zdravstvenu zaštitu.

Prisutnim medijima obratili su se načelnik Općine Novi Grad mr. Semir Efendić, direktor Doma zdravlja "Novi Grad" dr. Abel Baltić, predstavnici vijećnika najbrojnijih klubova DF-a i SBB-a, Mirza Trhulj i Sanela Fijuljanin i drugi predstavnici političkih subjekata OV Novi Grad.

Iznijeli su zajednički stav da se hitno moraju popuniti nedostajući medicinski kadrovi u Domu zdravlja i omogućiti normalno funkcionisanje primarne zdravstvene zaštite. Ukazali su na činjenicu da već duži period Domu zdravlja nedostaje između jedne trećine i jedne četvrtine uposlenika, da u svakom domu zdravlja i ambulanti najčešće radi samo

po jedan ljekar u smjeni, te da vrlo često primi više od 100 pacijenata dnevno, tako da je nemoguće pružiti adekvatnu zdravstvenu uslugu.

Upućen je zahtjev vlastima u KS, Ministarstvu zdravlja, Vladi i Skupštini Kantona Sarajevo, da se promijeni zakon i da se domovi zdravlja u Kantonu Sarajevo, kao i u svim drugim kantonima u BiH, prepuste na upravljanje lokalnim zajednicama. Nigdje osim u Sarajevu, domovima zdravlja ne upravlja kantonalna institucija. Općine vrše upravljanje domovima zdravlja, i to rade puno efikasnije, a pored toga, domovi zdravlja se ne finansiraju kroz budžet Kantona, već ih finansiraju zavodi zdravstvenog osiguranja kroz doprinose koji građani plaćaju, istaknuto je na konferenciji za medije.

Naglašeno je da pitanje zapošljavanja medicinskog osoblja neće biti riješeno dok god bude postojao trougao Ministarstvo, Vlada i Zavod zdravstvenog osiguranja, i dok bude postojala obaveza da Vlada odobrava svako zapošljavanje doktora i drugog medicinskog kadra.

Od Vlade KS je zatraženo da se hitno primi određen broj ljudi u domove zdravlja, kako bi se mogla obavljati funkcija primarnog zdravstva u Kantonu Sarajevo. Narušen sistem primarnog zdravstva, narušava i druge nivoe sekundarnog i tercijarnog zdravstva, koji također ne mogu efikasno raditi, zaključeno je.

Prisutnima se obratio i Mirza Trhulj, predstavnik Kluba vijećnika DF-a koji je istakao da je OV više puta upućivalo inicijative prema Vladi KS, i da nikada nisu dobili odgovor, niti se išta uradilo po tom pitanju.

Sanela Fijuljanin, predstavnica Kluba vijećnika SBB-a Novi Grad, kazala je da je press konferencija apel da se pomogne ovim ljudima, obzirom na omjer broja stanovnika općine i uposlenih medicinara. „Podatak da jedan tim porodične medicine ima do 2.000 pacijenata znači da statistički podaci pokazuju da jedan tim vodi oko 4.000 pacijenata“, dodala je Fijuljanin.





Potpisani ugovori za sufinansiranje novoregistriranih obrtnika

Od maja 2018. godine, od kada se provodi podsticajna mjera sufinansiranja troškova samostalnih poduzetnika - početnika u biznisu, Općina Novi Grad Sarajevo sufinansirala je troškove poslovanja 220 novoregistriranih obrtnika koji imaju prebivalište na području općine Novi Grad. U zgradi Općine Novi Grad Sarajevo, 22.marta, potpisani su ugovori sa 23 obrtnika koji su djelatnost registrirali u 2019. godini. Ovom podsticajnom mjerom sufinansiraju se troškovi poslovanja u periodu od dvije godine.

Emir Dedović, pomoćnik načelnika Općine Novi Grad za finansije i privredu, istakao je da se radi o jednoj od mjera koje Općina provodi u posljednjih nekoliko godina, a koje se tiču otvaranja novih radnih mjesta i podrške privredi, s ciljem povećanja broja zaposlenih na području općine Novi Grad, ali i pružanja perspektive u ovom dijelu privrede.

“Nastojimo i mi sa lokalnog nivoa, u skladu sa svojim mogućnostima, da damo podršku mladim ljudima da se ne opredjeljuju za sve aktuelniju priču o odlasku i traženju zaposlenja negdje van BiH, odnosno van Kantona Sarajevo i općine Novi Grad. Naše podsticajne mjere su široke, a ova se odnosi na malu privredu ili fizička lica, odnosno obrt. Ova podsticajna mjera je dala rezultat tako da smo mi u zadnje dvije godine imali 220 novih obrta, za koje smo iz budžeta izdvojili više od 500.000 KM. Finansijska podrška traje dvije godine, dakle u najrizičnijem periodu za razvijanje biznisa kod malih poduzetnika. Velika je zainteresiranost, a danas smo potpisali 23 ugovora za podršku različitim djelatnostima”, izjavio je Dedović.



Pomoćnik načelnika Općine Novi Grad
Emir Dedović



Kroz biznis oplemeniti prostor u kojem ljudi borave

Tokom 28 godina rada u jednoj firmi, Medina Berberović, inače po struci agronom, kaže nije imala priliku ispoljiti svoju kreativnost i ljubav prema biljkama. „Nisam mogla da ispoljim ono što me zanima. Nakon što sam ostala bez posla odlučila sam da napravim nešto svoje što sam oduvijek željela. Kockice su se posložile baš u pravo vrijeme, pokrenula sam vlastiti biznis i uzgajam biljke na jedan specifičan način, prilagođen kućnom ambijentu. Sistem uzgoja je neklasično dizanje biljaka u vertikalni položaj, nakon čega dobijemo malu zelenu oazu koju možemo aplicirati čak i na sto. Još uvijek sam u fazi analize i istraživanja. Suština je približiti biljni svijet čovjeku, oplemeniti prostor u kojem ljudi borave, za dobrobit čovjeka“, naglašava Medina, dodajući da je uz podršku lokalne zajednice puno lakše.



Ima posla i u BiH, treba raditi pa očekivati rezultat

Jedan od potpisnika je Amel Alić, koji se bavi izradom elektro razvodnih ormara i održavanjem električnih postrojenja. Ističe da će sredstva iskoristiti za kupovinu električnih uređaja koji će mu olakšati obavljanje posla. „Trenutno sam jedini zaposlen, ali u pripremi su ugovori koji bi se trebali realizovati, i nadam se da će se firma vremenom proširiti. Radim sve poslove koji su u vezi održavanja elektro postrojenja, to je dio terenskog posla, a u radionici se vrši izrada razvodnih ormara za navedena postrojenja. Želim se zahvaliti Općini Novi Grad na podršci i poručujem mladima da ostanu u BiH, ima dovoljno i prostora i posla za sve nas“, ističe Amel.

Firma „Limifix“ za ispravljanje udubljenja na autima bez farbanja

Sifa Zahirović, sa sinom Dženanom, pokrenuli su obrtničku djelatnost za popravku udubljenja na autima „Limifix“. Dženan je po struci autolimar, tako da je odlučio da pokrene djelatnost. „Firma koju sam pokrenuo se bavi ispravljanjem udubljenja na autima bez farbanja. U pitanju je posao koji je rijedak u gradu, ali i državi. Nakon što sam uvidio da se u gradu niko ovim ne bavi, odlučio sam da pokrenem vlastiti posao. Ovo mi je jedini izvor prihoda, nisam imao volje da idem vani, želio sam da ostanem u svojoj državi i da pokrenem neki posao. Svima bih preporučio da pokušaju pokrenuti vlastiti biznis. Perspektive ima, iako je neki ne vide, ali iz iskustva znam da posla ima. Treba „zapeti“, raditi i onda dođu rezultati.“

Dubinsko čišćenje namještaja, tepiha...

Dvadesetdvogodišnji Semin Memišević osnovao je obrtničku djelatnost za dubinsko čišćenje namještaja, automobila, tepiha... Ovaj mladić nije želio čekati na posao, uzeo je stvar u svoje ruke i pokrenuo obrt, te osigurao sebi radno mjesto. „Sredstva će mi dobrodoći, prvenstveno za plaćanje doprinosa. Trenutno radim sam, a pomaže mi i mama. Teško je u prvim godinama od pokretanja biznisa plaćati i doprinose, jer su svake godine sve veći nameti. Stoga je podrška lokalne zajednice od neprocjenjive važnosti za nas početnike“, naglasio je.



Za poljoprivredne svrhe građanima na besplatno korištenje dato više od 10 hektara zemlje



U namjeri da ublaži negativne ekonomske posljedice izazvane pandemijom koronavirusa, Općina Novi Grad Sarajevo raspisala je, 3. aprila, javni poziv fizičkim i pravnim licima za davanje na besplatno korištenje zemljišta u državnoj svojini u poljoprivredne svrhe.

Na javni poziv se prijavilo 240 osoba, među kojima je veliki broj mlađe populacije, ali i onih koji su se po prvi put odvažili na poljoprivredne korake.

Ovaj potez lokalne zajednice građani su prihvatili sa oduševljenjem, na jednogodišnji period besplatno je dodijeljeno više od 10 hektara



zemlje koja je prethodno kultivisana i pripremljena za proljetnu sjetvu u naseljima Buća Potok, Mojnilo, Bačići, Rajlovac i Reljevo. Za sve korisnike Općina je osigurala sadni i sjemenski materijal, kao i savjete stručnjaka iz JP „LOKOM“, tako da su usjevi zasađeni na vrijeme.

Davanje na korištenje neiskorištenog zemljišta jedan je od načina prevazilaženja stanja u kojem se našla naša zemlja zbog pandemije koronavirusa. Zemljište je dodijeljeno u cilju povećanja poljoprivredne proizvodnje u periodu trajanja proglašenja stanja prirodne i druge nesreće i saniranja šteta uzrokovanih pandemijom.



JP „Lokom“ udvostručio proizvodnju organske hrane



Osim podrške poljoprivrednim proizvođačima, posebno onima koji su odlučili baviti se poljoprivrednom proizvodnjom, Općina Novi Grad, putem JP „Lokom“ veliku pažnju posvećuje i organskoj proizvodnji. Još 2017. godine, preduzeće „Lokom“ je uz podršku Vlade Švicarske, na padinama Mojmila, uspostavilo proizvodno – edukacioni poljoprivredni poligon urbane poljoprivrede, gdje je na površini od 10 duluma zasnovana proizvodnja maline, a u plastenicima površine oko 700 metara kvadratnih proizvode se razne povrtlarske kulture.

Kupci su vrlo brzo nakon pokretanja ovog projekta prepoznali razliku između organski proizvedene hrane i onih proizvoda koji se mogu kupiti na pijacama i policama supermarketa, i upravo veliki interes građana za kupovinom i konzumiranjem domaćih proizvoda, rezultirao je proširenjem proizvodnih kapaciteta novim plastenicima i površinama na otvorenom.

Od ove godine poljoprivredna proizvodnja je proširena na oko 700 metara kvadratnih dodatnog prostora kada je u pitanju plastenička proizvodnja i proizvodnja rasada sezonskog cvijeća.

Proljetna sjetva je već završena, u plastenicima su zasađene određene sorte paradajza, krastavaca, paprike i patlidžana, a proizvodne površine su gotovo udvostručene, proizvodnja je proširena i na otvoreno polje, te je na lokalitetu u Bojniku zasađeno blizu deset duluma krompira, tako da će građanima biti na raspolaganju i organski uzgojeni krompir.

„Dosadašnja proizvodnja bila je bazirana na oko 700 metara kvadratnih zaštićenog prostora, a od ove godine, proizvodne površine su gotovo udvostručene, tako da ćemo moći proizvesti znatno veće količine organski zdravih poljoprivrednih proizvoda. Značajno je povećana i plastenička proizvodnja, sa dodatnih 600 metara kvadratnih plasteničkog prostora, a u pripremi je i plastenik u kojem će

se od narednog proljeća krenuti sa proizvodnjom vlastitog rasada sezonskog cvijeća“, ističe Adnan Šabanović iz preduzeća „Lokom“, zadužen za organsku proizvodnju.

On pojašnjava da organska proizvodnja nije samo proizvodnja bez vještačkih đubriva i hemikalija, nego se ona bazira na organskim principima uzgoja, a JP „Lokom“ posjeduje i certifikat za ovu vrstu poljoprivredne proizvodnje.

Svježe, tek ubrano povrće, uzgojeno na prirodan način, bez upotrebe bilo kakvih pesticida i umjetnih gnojiva, kao i prethodnih godina, građani će moći kupovati upravo na proizvodno - edukativnom poligonu na Mojmilu, u ulici Ferida Srnje bb, ali i u Bosanskoj tržnici na Dobrinji, a ovi proizvodi i dalje će se moći naći na prodajnom mjestu kod sportske dvorane Dobrinja, s obzirom da je potražnja zaista velika.

Organska proizvodnja je sve češće prepoznata kao proizvodni sistem koji može zadovoljiti potrebe šire društvene zajednice, uz to je to jedan od načina kojim se stanovništvu omogućava da na dohvat ruke imaju zdravu, a domaću hranu.

U završnoj fazi radovi na objektima sportske dvorane OŠ "Umihana Čuvidina" i vrtića "Vjeverica"



Načelnik Općine Novi Grad Sarajevo Semir Efendić, sa saradnicima i izvođačima radova obišao je gradilišta dva najveća infrastrukturna projekta iz oblasti osnovnog i predškolskog obrazovanja koja se realiziraju na području općine Novi Grad. Radi se o sportskoj dvorani sa dodatnim učionicama i pratećim sadržajima, koja se gradi uz Osnovnu školu „Umihana Čuvidina“ u Boljakovom Potoku i vrtiću „Vjeverica“ na Alipašinom Polju, čije je otvaranje planirano u narednoj školskoj godini.

„Kada je u pitanju projekat proširenja škole „Umihana Čuvidina“ i izgradnje sportske dvorane, tamo su radovi u odmakloj fazi, i mi smo već raspisali tender za opremu za taj objekat, u ovoj godini smo imali plan da se stavi u funkciju dio škole, odnosno učionice. Međutim, sada imamo zahtjev Ministarstva za obrazovanje, nauku i mlade KS da i vrtić bude u funkciji od ove godine zbog velikog broja djece koja su na listama čekanja za upis. Ukoliko Ministarstvo uspije da osigura sredstva za opremu tog vrtića, on bi mogao da bude u funkciji sa početkom nove školske godine“, izjavio je načelnik Efendić.

Nejra Tatlić, predstavnica izvođača radova na objektu uz školu „Umihana Čuvidina“ firme Eko-teh, kazala je da radovi tokom pandemije nisu ni u jednom trenutku došli u pitanje. „Raduje me činjenica da smo u završnoj građevinskoj fazi, u toku su fini montažni radovi mašinskih instalacija i hidroinstalacija, odnosno montaže sanitarnih



uređaja i podopolagački radovi. Samim tim, sa završnim dijelom radova možemo već obejkat privoditi kraju“, istakla je Nejra. U sklopu objekta bit će otvorene dodatne učionice i dječiji vrtić u kojem će moći boraviti oko 120 djece, i drugi prateći sadržaji.



Ugodan prostor za boravak 300 mališana



Tokom obilaska objekta vrtića „Vjeverica”, gdje je u proteklom periodu bilo zastoja u izvođenju radova, jer se čekalo na saglasnost od Ministarstva za povećanje broja odgojnih grupa, ali i zbog pandemije koronavirusa, rečeno je da će za završetak radova, vjerovatno trebati više vremena od samog početka septembra, te je u razgovoru sa izvođačem radova definisana daljnja dinamika radova na dovršetku rekonstrukcije vrtića.

Očekuje se da taj rok bude pomjeren najdalje mjesec, mjesec i po, tako da je 15. oktobar ove godine definisan kao krajnji rok za otvaranje kompletnog objekta. To će biti jedan od najljepših, ako ne i najljepši vrtić u Sarajevu, koji je izolovan od gradske buke automobila, nalazi se u zelenom pojasu dijela Alipašino Polja, imat će devet odgojnih grupa, a u njemu će moći boraviti oko 300 djece.

Općina Novi Grad već duži period vodi aktivnosti da se ovaj vrtić stavi u funkciju. Iako je bilo dosta administrativnih problema prije samog početka rekonstrukcije, ipak nije se odustalo od namjere da se krene u taj projekat. Općina je, uz saglasnost JU „Djeca Sarajeva”, krenula sa implementacijom ovog projekta, koji se privodi kraju. U početku je bilo neizvjesno kako osigurati sredstva, ali zahvaljujući razumijevanju tadašnje ministricе za obrazovanje, nauku i mlade Kantona Sarajevo Zinete Bogunić, na početku ove godine osigurana su sredstva za većinu radova na objektu.

Mensur Neradin, predstavnik firme INGRA, koja radi rekonstrukciju vrtića, uvjeren je da će radovi biti završeni prema planiranoj dinamici. „Urađeno je 90% zidarskih radova, na spratnoj etaži urađeno je i malterisanje. Slijede mašinski radovi, a radi se i prednji dio fasade, kao i izrada konstruktivnog dijela preostale fasade. U prizemlju imamo malo više radova, potrudimo se da svi radovi budu završeni prema utvrđenoj dinamici”, rekao je Neradin.

Izgrađeno i obnovljeno osam sportskih i dječijih igrališta

U općini Novi Grad u proteklom periodu izgrađeno je i obnovljeno osam igrališta. Izgrađena su tri potpuno nova sportska igrališta u ulici Safeta Zajke, u blizini LOT-a 2C, u Boljakovom Potoku, zatim na Mojmilu kod Eko-kuće, te na Dobrinji u ulici Šefika Dorića.

Igrališta za manju i djecu starijeg uzrasta izgrađena su u blizini Doma oslobodilaca na Žuči, te u ulici Bajrama Zenunija u A fazi Alipašinog Polja.

Radilo se i na obnovi dotrajalih dječijih igrališta i zamjeni sprava za igru, podloge i ograde. Obnovljena su igrališta u ulici Voje Dimitrijevića na Dobrinji, u Gradačackoj ulici na Čengić Vili, kao i igralište u C-fazi Alipašinog Polja.

Sportsko igralište sa umjetnom travom i tribinama u ulici Safeta Zajke

U ulici Safeta Zajke, u blizini kružnog toka na LOT-u 2C u Boljakovom Potoku izgrađeno je sportsko igralište sa umjetnom travom, tribinama i pratećim objektima

Uz sportski teren koji je ograđen, postavljeni su i prateći objekti u kojima su svlačionice, sanitarni čvorovi, kancelarije za upravu i sudije, kao i dugi šadržaji. Teren će se koristiti za mali nogomet, a njegove dimenzije su prilagođene i za odvijanje međunarodnih utakmica. Osvjetljen je reflektorima, te će se moći koristiti i u večernjim terminima.

Sportsko igralište gravitira gusto naseljenim mjesnim zajednicama „Alipašin Most-I“ i „Briješće“, a osim djece njegovoj izgradnji raduju se i roditelji, ali i uprava Omladinskog fudbalskog kluba „Biser 96“ koja će u sklopu terena dobiti prostorije. Osim tog kluba sportski teren koristit će i drugi klubovi i djeca iz okolnih naselja.

Projekat je finansirala Općina Novi Grad sredstvima u iznosu od oko 320.000 konvertibilnih maraka.





Na Mojmilu izgrađeno prvo sportsko igralište na području MZ "Švrakino Selo-2"



U ulici Rasima Turkušića izgrađeno je sportsko igralište za mali fudbal, košarku i odbojku sa tribinama kapaciteta 150 mjesta.

Igralište se nalazi u neposrednoj blizini eko - kuće i bit će dio Parka šuma Mojnilo, a prvo je sportsko igralište na području mjesne zajednice "Švrakino Selo - 2", kojoj gravitira 14 ulica sa velikim brojem djece i omladine, koja do sada nisu imala prostor na kojem će igrati lopte.

Obzirom da se radi o padinskom dosta nepristupačnom terenu, ipak vještiji projektanti smjestili su veoma lijepo igralište u strmi teren zemljišta u općinskom vlasništvu koje je do prošle godine bilo neiskorištena i neuređena šikara. Cijela konfiguracija zidova i horizontalnih ploha urađena je od armiranog betona, nakon čega se pristupilo izgradnji i asfaltiranju univerzalne plohe, te postavljanju ograde oko igrališta.

Igralište ima dva ulaza, iz ulice Ramiza Turkušića sa sjeverne strane, a sa južne strane će biti povezano sa platoom eko - kuće. Njegovom izgradnjom je osigurano još jedno mjesto za sport i rekreaciju, kako stanovnicima ovog dijela Novog Grada, tako i posjetiocima Parka šuma Mojnilo. Vrijednost radova je 299.000 KM, a radove je izvela građevinska firma "Mibral".



Novo sportsko igralište u ulici Šefika Dorića na Dobrinji



Završeni su radovi na izgradnji sportskog igrališta u ulici Šefika Dorića, u mjesnoj zajednici "Dobrinja A".

Uz građevinske radove koji su izvedeni na sportskoj plohi, postavljen je novi mobilijar, golovi, tabla za košarku, klupe za sjedenje i korpe za otpatke. Igralište je dobilo i multifunkcionalnu podlogu, u svijetloplavoj i žutoj boji, što mu daje poseban izgled, a cijeli prostor je ograđen.

Sportski teren čini jednu cjelinu podijeljenu u dvije zone, od kojih je jedna predviđena za košarku, a druga za mali nogomet.

Za navedene radove iz općinskog budžeta za 2019. godinu izdvojeno je oko 106.000 KM.





Dječije igralište kod Doma oslobodilaca na Žuči

Nakon što je Općina Novi Grad prije dvije godine na Žuči izgradila Dom oslobodilaca sa muzejom eksponata novogradskih ratnih brigada i ugostiteljskim sadržajima, ovo mjesto ubrzo je postalo omiljeno za boravak svih generacija naših sugrađana, a posebno najmlađih.

Kako bi im osigurala mjesto za igru i uživanje u ovom prelijepom ambijentu, Općina je u neposrednoj blizini izgradila dječije igralište, gdje će se djeca igrati dok njihovi roditelji odmaraju uz ispijanje kafe u bašti restorana Doma oslobodilaca i na obližnjim klupama.

Igralište čine dvije odvojene cjeline, namijenjene za djecu manjeg i većeg uzrasta. Igralište za djecu manjeg uzrasta je u potpunosti ograđeno panelnom LEGI ogradom sa ulaznom kapijom, zbog bolje kontrole i zaštite djece. U ovom dijelu igrališta postavljena je lju-ljačka sa dva ljuljna mjesta, njihaljke, pješčanik, a kao podloga je zemlja sa prirodnom travom.

Također, igralište za djecu većeg uzrasta je ograđeno sa dvije strane dok se sa otvorene strane nalazi parking, zelenilo i klupe. U tom dijelu djeca mogu uživati uz korištenje kule sa toboganima, klackalica i lju-ljačke. Igrališta dijele i uokviruju pješačke staze sa klupama za odmor.



Dječije igralište u ulici Voje Dimitrijevića obnovljeno i osvijetljeno

Dječije igralište u ulici Voje Dimitrijevića, na području MZ "Dobrinja B", sanirano je i rekonstruisano, tako da je dobilo potpuno novi izgled.

Uređena je priprema površine, nasipanje riječnog oblutka i izgradnja pristupne staze. Potom je izgrađena javna rasvjeta na igralištu, nakon čega su postavljene nove sprave za igranje najmlađih stanovnika mjesnog područja.

U narednim fazama planirano je postavljanje zaštitne ograde kao i izgradnja drugog dijela koji će biti namijenjen za sportske aktivnosti.



Novo dječije igralište u ulici Bajrama Zenunija na Alipašinom Polju

Stanovnici mjesne zajednice Alipašino Polje A-1 dobili su novi, lijepo uređeni prostor za igru najmlađih. U ulici Bajrama Zenunija, izgrađeno je dječije igralište, na kojem su u dva nivoa postavljene kombinirane sprave za igru manje i nešto starije djece uzrasta do osam godina.

Igralište predstavlja jednu cjelinu sa dosta sprava za igru, okruženih zelenim površinama i klupama za sjedenje, a cijeli prostor će biti ograđen. Najmlađima je na raspolaganju ljuljačka sa dva ljuljna mjesta i njihalice, dok su kula sa dva tobogana i klackalice predviđene za stariju djecu.

Svaki dio opreme je izdvojen posebno, u vidu „ostrva“- platformi sa gumenom zaštitnom podlogom. Vrijednost radova iznosi 55.960 KM.



Obnovljeno dječije igralište u C-fazi Alipašinog Polja

Završeni su radovi na rekonstrukciji i izgradnji dječijeg igrališta u C-fazi Alipašinog Polja.

S obzirom na to da je igralište bilo u lošem stanju, a sprave za igru oštećene i dotrajale, Općina Novi Grad uradila je njegovu obnovu, kako bi mališanima ovog dijela Novog Grada osigurala ugodniji prostor za igru.

U sklopu rekonstrukcije, izvršena je zamjena oštećene opreme i podloge novom, ali i popravka pojedinih sadržaja, te osvježanje molersko farbarskim zahvatima. Ovim radovima igralište je dobilo sasvim drugačiji izgled i čini jednu cjelinu uokvirenu panelnom LEGI ogradom. Svaki dio postojeće opreme izdvojen je posebno, u vidu „ostrva“ uokvirenih ivičnjacima sa zaštitnom gumenom podlogom.

Samostojeći tobogan zamijenjen je novim, klackalice, ljuljačke i kula dodatno su učvršćene betonskim temeljima, oštećena drvena konstrukcija također je zamijenjena novom, te je ofarbana eko - bojom. Osim toga, igralište je dopunjeno i novim mobilijarom



za djecu manjeg uzrasta, kao što su njihalice, kućica, pješčanik i ljuljačka - gnijezdo.

Dok su mjere zabrane okupljanja zbog koronavirusa na snazi, radovi su završeni i igralište je spremno za djecu koja sa velikom željom iščekuju dan kada će ponovo moći uživati u bezbrižnoj igri na otvorenom.

Završena rekonstrukcija dječijeg igrališta u Gradačačkoj ulici na Čengić-Vili

Obnovljeno je dječije igralište u Gradačačkoj ulici, na Čengić-Vili, gdje je postavljena antistres podloga i novi sadržaji za dječiju igru.

Nakon što su završeni zemljani radovi i postavljanje pijeska, uslijedila je ugradnja mobilijara, parkovskih klupa i korpi za otpatke.

Djeci su na raspolaganju potpuno nova kula sa toboganima, klackalica, ljuljačka i njihalice, a roditelji će moći sjesti i odmoriti dok se njihova djeca igraju.

Za ove radove iz općinskog budžeta izdvojeno je oko 20.000 KM.





Općina Novi Grad i Direkcija za puteve KS potpisale sporazum o zajedničkom finansiranju rekonstrukcije ulice Avde Palića u Zabrdū

Načelnik Općine Novi Grad Sarajevo Semir Efendić i direktor Direkcije za puteve Kantona Sarajevo Selmir Kovač, potpisali su sporazum o zajedničkom finansiranju projekta rekonstrukcije i sanacije oko kilometar ulice Avde Palića, glavne naseljske saobraćajnice u Zabrdū.

Saobraćajnica je od izuzetnog značaja za gusto naseljeno područje općine Novi Grad, u ranijem periodu bila je značajno oštećena zbog saobraćanja kamiona prema gradskoj deponiji. U gornjem dijelu ulica je rekonstruisana, dok će preostali dio, nešto manji od kilometar dužine, biti rekonstruisan u narednom periodu.

Općina Novi Grad izvršila je izradu projektne dokumentacije, pribavila potrebne dozvole, a osim saobraćajnice u punom profilu sa dvije saobraćajne trake i pješačkom stazom bit će urađena i oborinska odvodnja. Projekat će se realizirati kroz dvije budžetske godine, vrijednost radova je 1.080.000 KM, od kojih jednu trećinu izdvaja Općina, a dvije trećine Direkcija za puteve KS, s tim da će Općina Novi Grad biti implementator projekta i provesti proceduru odabira izvođača radova i same realizacije projekta.

„To je za nas veoma značajan projekat, u protekloj godini Općina je izvršila rekonstrukciju vodovodne mreže u ovoj ulici. Uloženo je oko 600.000 KM u vodovodni sistem koji je završen, a prije samog asfaltiranja završeno je sve u trupu saobraćajnice (vodovodne, gasne i druge instalacije), tako da neće biti potrebe za prekopavanjem asfalta i sl.“, izjavio je načelnik Efendić.

„Rekonstrukcija ulice Avde Palića jedan je od projekata koji nam je zadavao glavobolje. Općina se uključila da pomogne nama, a i



stanovnicima tog gusto naseljenog dijela Novog Grada. Raspisali smo i javnu nabavku za izbor izvođača radova u ulici Ahatovića, pri kraju je projekat odvodnje za ulicu Adema Buće, očekujemo završetak projekta za rekonstrukciju Bulevara Mimar Sinana, da raspisemo tender za odabir izvođača radova“, rekao je Selmir Kovač.

Saobraćajnice koje se rade u saradnji sa Direkcijom za puteve su po kategorizaciji od kantonalnog značaja, a nalaze se na prostoru općine Novi Grad Sarajevo.

Nove pješačke staze prema stambenoj zgradi i Istiklal džamiji na Otoci

Završena je izgradnja pješačkih staza u dijelu 7. transverzale, od Bulevara Meše Selimovića do Istiklal džamije na Otoci.

Staze su izgrađene s obje strane saobraćajnice, od pješačkog prelaza prema novoizgrađenoj stambenoj zgradi do šetnice pored Miljacke, i od pješačkog prelaza do džamije.

Prilikom izgradnje ovog dijela 7. transverzale, uz saobraćajnicu nisu izgrađeni trotoari, pa su pješaci bili primorani ići preko zelenih površina ili kolovozom saobraćajnice. Izgradnjom šetnica širine tri metra, sa razdjelnim zelenim pojasom, koji stazu odvaja od kolovoza, značajno će biti olakšano kretanje pješacima, kako stanarima obližnje zgrade, tako i korisnicima Olimpijskog bazena i džamije.

Asfaltiranju su prethodili radovi na uklanjanju slojeva zemlje, tampiranju, zamjeni i postavljanju ivičnjaka. U narednim danima uradit će se uređenje, odnosno humuziranje zelenog pojasa, time će ovaj dio Novog Grada poprimiti još ljepši izgled.



Sanirana ulica Safeta Hadžića do spoja sa Kodžinom

Na ulazu u naselje Švrakino Selo završeni su radovi na sanaciji, djelimičnom proširenju i asfaltiranju ulice Safeta Hadžića do spoja sa Kodžinom i ulicom Bosanskih kraljeva, a koja je bila u lošem stanju. Radovi su izvedeni od spoja ulice Safeta Hadžića broj 187 do raskrsnice ulica Bosanskih kraljeva i Kodžina.

Radnici građevinske firme "Orman" uklonili su stari dotrajali asfaltni sloj, izvršili iskope, a asfaltirali kolovoz i postavili ivičnjake sa obje strane ceste, te ugradili šahtove i slivničke rešetke za odvodnju površinskih voda.

Novi asfaltni sloj, prosječne širine 5,5 metara postavljen je u dužini od oko 150 metara, sa obostranim trotoarima. Ovim radovima, u velikoj mjeri će se poboljšati saobraćajna komunikacija za jedno od najvećih naselja na području općine Novi Grad, Švrakino Selo.

Radovi su izvedeni u sklopu projekta rekonstrukcije i izgradnje lokalnih i nekategorisanih cesta, trgova i mostova LOT-3, kojim je obuhvaćeno sedam ulica, za šta je iz budžeta Općine Novi Grad za 2019. godinu izdvojeno 354.949 KM.

U narednim danima radit će se sanacija pješačke staze u ulici Adija



Mulabegovića od broja 1 do spoja sa ulicom Senada Mandića Dende u naselju Saraj - Polje. Planirana je i sanacija dijela ulice Adnana Žunića od broja 58 do broja 27 u Briješću, kao i sanacija dijela ulice Paljevska od broja 296 do broja 302 u Reljevu.

Preostalo je da se asfaltira ulica Enesa Bičića od broja 26 do spoja sa ulicom Porodice Dizdarević u naselju Zabrdje, pripremljena je tamponska podloga za asfaltiranje oko 200 metara ceste i izgrađen potporni zid, u narednim danima slijedi polaganje asfaltnog sloja.

Asfaltirana pristupna saobraćajnica u ulici Muzafera Mešića u Buća Potoku

Proteklih dana završena je sanacija i asfaltiranje dijela ulice Muzafera Mešića od broja 2 do sportske dvorane "Srce" u Buća Potoku. Asfaltirano je oko 120 metara pristupne saobraćajnice individualnim stambenim objektima, kao i postavljanje ivičnjaka u dužini od 90 metara. Postavljanjem saobraćajne signalizacije uveden je jednosmjerni režim kretanja vozila, čime je riješen problem nepreglednog ulaza sa glavne saobraćajnice, iz ulice Adema Buće.

Radovi su izvedeni u sklopu projekta rekonstrukcije i izgradnje lokalnih i nekategorisanih cesta i trgova LOT-3, kojim je obuhvaćeno sedam ulica, a za koji je iz budžeta Općine Novi Grad za 2019. godinu izdvojeno 354.949 KM



U toku finalni radovi na izgradnji mosta preko željezničke pruge na IX transverzali

Načelnik Općine Novi Grad Sarajevo održao je sastanak sa ministrom saobraćaja Kantona Sarajevo Adijem Kalemom, kojem je prisustvovala i ministrica pravde i uprave Kantona Sarajevo Mersa Kustura i direktor Direkcije za puteve Kantona Sarajevo Selmir Kovač.

Tema sastanka bila je dovršetak izgradnje IX transverzale i spoj ove transverzale sa ulicom Safeta Zajke, s obzirom na činjenicu da se određeni period čeka da Skupština KS donese okvirnu Odluku o preseljenju privremenih objekata koji se trenutno nalaze na lokaciji gdje će se graditi kružni tok, a čije je uklanjanje neophodno kako bi se omogućio dovršetak projekta IX transverzale.

„Vijeće ministara nedavno je utvrdilo prijedlog ugovora o zajmu između Bosne i Hercegovine i Evropske banke za obnovu i razvoj iz kojeg će dio sredstava biti usmjeren za finansiranje projekta dovršetka izgradnje IX transverzale. Ostalo je još da Predsjedništvo Bosne i Hercegovine taj ugovor verifikuje i da se on objavi u Međunarodnim službenim novinama, kako bi Skupština Kantona Sarajevo mogla donijeti Odluku. To je posljednji formalno - pravni korak koji stoji na putu kako bi se dovršila izgradnja IX transverzale, odnosno kako bi se transverzala spojila sa ulicom Safeta Zajke“, kazao je načelnik Efendić.

Naglasio je da se došlo do toga da se osiguraju uslovi da Skupština KS uskoro donese Odluku kojom će se omogućiti isplata sredstava u građevinskoj vrijednosti objekata koji se nalaze na lokaciji na kojoj će se graditi kružni tok na spoju ulica Safeta Zajke i Smaila Šikala, u Boljakovom Potoku.

Izgradnja mosta preko željezničke pruge privodi se kraju, a sa izvođačem radova ugovor je potpisan, projekat je u međuvremenu preprojektovan, tako da su izgrađeni stubovi umjesto nasipa kako je ranije bilo planirano. Prostor koji će ostati ispod kružnog toka bit će iskorišten za poslovne, ali i druge sadržaje potrebne naselju Boljakov Potok, a prije svega bit će iskorišten za kretanje pješaka i saobraćaja u mirovanju.







U Halilovićima se gradi saobraćajnica za pristup privrednim subjektima

Počeli su radovi na izgradnji servisne saobraćajnice za privredne subjekte u Halilovićima, koji su izgradnjom IX transverzale ostali bez saobraćajnog pristupa. Radove izvodi firma Euro-asfalt d.o.o. Sarajevo, a stručni nadzor vrši IPSA Institut d.o.o. Sarajevo.

Saobraćajnica dužine 416 metara sa dvije kolovozne trake i obostranim pješačkim stazama gradit će se od carinskog terminala u Halilovićima, prolazi kroz jedan od raspona izgrađenog nadvožnjaka IX transverzale, pored firme "STEP" i završava kod firme Energoinvest - tvornica dalekovodnih stubova d.d.

Ovim radovima bit će dovršena ranije izgrađena saobraćajnica za koju je Općina Novi Grad prilikom rješavanja imovinsko pravnih odnosa izdvojila oko 600.000 KM, otkupila zemljište na kojem je izgrađena saobraćajnica sa ugrađenim tamponom, a preostalo je još da se asfaltira, uradi odvodnja i javna rasvjeta.

Osim što će saobraćajno povezati dvije strane razdvojene izgradnjom IX transverzale i omogućiti putnu komunikaciju privrednim subjektima u zoni IX transverzale, ovaj prostor će dobiti potpuno novi i ljepši izgled. Također, saobraćajnica je značajna i za buduće redovno i vanredno održavanje objekta nadvožnjaka IX transverzale.

Vrijednost ugovorenih radova je 630.376 KM, a finansijeri su Ministarstvo saobraćaja KS, Direkcija za puteve KS i Općina Novi Grad Sarajevo. Rok za izvođenje radova je 3 mjeseca.

Pored građevinskog dijela izgradnje saobraćajnice sa odvodnjom, ugovorena je i izgradnja javne rasvjete duž cijele saobraćajnice.



Uz distributivnu gasnu mrežu, u Dobroševičkoj ulici položen i novi asfalt

Završena je izgradnja jednog kilometra primarne gasne mreže u Dobroševićima, i 300 metara distributivne gasne mreže u dva kraka Dobroševičke ulice, nakon čega je izvršeno i asfaltiranje oba kraka pomenute ulice.

U ovoj ulici preostalo je još da se uradi oko 300 metara primarnog gasovoda, nakon čega će radovi biti nastavljeni u Ulici 14 juni, gdje će se raditi još oko 300 metara gasne mreže, a nakon toga i asfaltiranje makadamske ceste. Izgradnjom gasovoda kroz ovo naselje, omogućava se priključenje za više od 150 individualnih stambenih objekata na gasni sistem.

Ovi radovi dio su projekta gasifikacije jednog od najvećih novogradskih naselja Dobroševići i naselja Aneks, gdje je u ulici Harisa Kurtovića proteklih dana završena izgradnja blizu pola kilometra gasovoda, a potom i asfaltiranje ulice.

Općina Novi Grad već nekoliko godina u kontinuitetu izdvaja sredstva za izgradnju gasne mreže na svom području, u proteklim godinama primarna gasna mreža provedena je ispod autoputa, ispod rijeke Bosne. Početkom ove godine sa KJKP „Sarajevogas“ potpisan je protokol o saradnji na izgradnji primarne gasne mreže u ulici Dobroševička i distributivne gasne mreže u ulicama 14. juni, u naselju Dobroševići i ulici Harisa Kurtovića, u naselju Aneks.

Ovim projektom bit će izgrađena 2,3 kilometra gasne mreže, za šta je Općina Novi Grad iz budžeta izdvojila 172.000, dok je Federalno ministarstvo okoliša i turizma sufinansiralo projekat sa 85.000 KM.

Njegovom implementacijom stvorit će se mogućnosti za priključenje velikog broja stambenih objekata na gasnu mrežu i korištenja prirodnog gasa, a čime se doprinosi zaštiti okoliša i zdravlja ljudi.



Bolja saobraćajna komunikacija u ulici Zaima Imamovića, Naselju heroja Sokolje


Završeno je asfaltiranje ulice Zima Imamovića u Naselju heroja Sokolje, čime je kompletirano 600 metara saobraćajnice kojom se nesmetano odvija dvosmjerna saobraćajna komunikacija.

Prošle godine u ovoj ulici je završena sanacija i asfaltiranje prvih 300 metara saobraćajnice, nakon čega je asfaltirano preostalih 300 metara ceste. Sami radovi na asfaltiranju su koštali oko 200.000 KM.

Prije toga izvršena je kompletna rekonstrukcija vodovodne mreže, vrijednost tih radova je 350.000 KM, s tim da oni uključuju i jedan dio ulice Numan paše Čuprilića, tako da su mještani dobili potpuno novu proširenu ulicu, širine 5,5 metara na cijeloj dužini. Vozila se sada mogu mimoilaziti, što ranije nije bilo moguće.

Ulica povezuje Naselje heroja Sokolje i Zabrdje, a osim što je bila uska, bila je i oštećena zbog provođenja različitih instalacija u periodu nakon posljednjeg asfaltiranja, koje je rađeno prije 15-tak godina, što je stanovnicima otežavalo svakodnevni život.

Realizacija ovog infrastrukturnog projekta od posebnog je značaja za mještane Zabrdja, čija djeca idu u školu na Sokolje, a omogućit će bolju saobraćajnu komunikaciju i povezivanje Naselja heroja Sokolje sa ostatkom općine, ali i uljepšati ovaj dio općine Novi Grad.





RADOVI U ULICI AMIRA KRUPALIJE U BUĆA POTOKU

Kanalizacija i oborinske vode neće više teći ulicama i praviti probleme stanovnicima

U ulici Amira Krupalije, u naselju Buća Potok u toku je nastavak realizacije projekta izgradnje separatne kanalizacione mreže koji obuhvata radove u ovoj ulici i dijelu ulice Safeta Isovića, a kojim se rješava dugogodišnji problem velikog broja stanovnika ovog gusto naseljenog područja Novog Grada.

U ulici Amira Krupalije, koja gravitira mjesnim zajednicama „Buća Potok“ i „Dolac“, prethodnih godina je izgrađeno oko 500 metara separatnog kanalizacionog sistema, od ulice Adema Buće kroz krug firme „Zrak“ do ulice Safeta Isovića.

To je dio naselja koji nije imao izgrađenu tehnički adekvatnu kanalizacionu mrežu, a izgradnjom novih oko 330 metara duplog sistema kroz samo naselje, to pitanje će biti riješeno na kvalitetan način. Kanalizacija i oborinske vode neće više teći ulicama i praviti poplave, a samim tim spriječit će se mogućnost pojave klizišta. Nakon što se ovaj sistem izgradi, uslovi života stanovnika ovog dijela naselja bit će znatno bolji i ugodniji, jer se njegovom realizacijom sprečava i mogućnost pojave higijensko-epidemioloških problema.

Realizacija projekta obuhvata izgradnju separatne kanalizacione mreže od kvalitetnih poliesterskih cijevi DN300 fekalna i oborinska, u ukupnoj dužini od oko 330 metara. Izveden je priključak nove kanalizacione mreže na postojeći, te se radi polaganje glavnih vodova i paralelno izvođenje kućnih priključaka.

Nakon što se završi izgradnja kanalizacionog sistema, cijela ulica u dužini trase će biti rekonstruisana i asfaltirana.

Izvođač radova je firma „Bujice“ iz Konjica, nadzor ispred krajnjeg korisnika vrši KJKP „Vodovod i kanalizacija“ d.o.o. Sarajevo, a stručni nadzor firma „Saraj inženjering“ d.o.o.



Nakon gasne mreže, stanovnici ulice Harisa Kurtovića, na Aneksu dobili i asfalt

Nakon distributivne gasne mreže, stanovnici ulice Harisa Kurtovića, u naselju Aneks, dobili su i asfalt.

Prethodno je završena izgradnja blizu pola kilometra gasovoda, na koji će se moći priključiti oko 50 domaćinstava. Priključenje stambenih objekata na gasnu mrežu vrši KJKP "Sarajevogas", prema ranije izrađenom projektu.

Nakon izgradnje glavnog voda i tamponiranja ceste, položen je asfaltni sloj, riješena odvodnja oborinskih voda, te su postavljeni šahtovi i slivničke rešetke. Time je ovaj dio naselja, uz gasnu mrežu, po prvi put dobio i asfaltiranu cestu.

Izgradnja gasne mreže nastavljena je u Dobroševićima, gdje je u dva kraka Dobroševičke ulice položeno 300 metara gasnog voda sa mogućnošću za priključenje 20 stambenih objekata. Preostalo je da se u ovoj ulici uradi još oko 1.300 metara gasne mreže, nakon čega će se radovi nastaviti u Ulici 14 juni, gdje će se raditi oko 300 metara gasne mreže, a potom i asfaltiranje makadamske ceste.

Ovim projektom bit će izgrađena 2,3 kilometra gasne mreže, za šta je Općina Novi Grad iz budžeta izdvojila 172.000, dok je Federalno ministarstvo okoliša i turizma sufinansiralo projekat sa 85.000 KM.



U ulici Vejsila Čurčića, izgrađena kanalizaciona mreža i asfaltirana cesta

U ulici Vejsila Čurčića u naselju Švrakino Selo završeni su radovi na asfaltiranju ceste, gdje je u proteklim danima završena izgradnja separate kanalizacione mreže, čime je riješen dugogodišnji problem mještana ovog dijela naselja.

Radi se o izuzetno stromoj ulici u kojoj nije bila riješena odvodnja fekalnih i oborinskih voda, pa su se one slijevale niz ulicu uzrokujući pri tome stanovnicima velike probleme, posebno u ljetnjem i zimskom periodu.

Radovima, koji su izvedeni u prethodnim danima, a kojima su fekalne i površinske vode prikupljene u kanalizaciju, i stambeni objekti priključeni na novoizgrađeni kanalizacioni sistem, riješeni su dugogodišnji problemi stanovnika ovog područja, a nakon toga pristupilo se i asfaltiranju ceste u punom profilu.

Radove koji se izvode u ovoj ulici, sa saradnicima i predstavnicima Savjeta MZ „Švrakino Selo-2“ obišao je općinski načelnik Semir Efendić.

Među prisutnima je bio i mještatin ovog dijela naselja Rizo Bolija. Zadovoljan izvedenim radovima, Rizo kaže da se u ovu ulicu doselio 1973. godine, gdje je izgradio kuću, ali ističe da nikada nisu imali riješenu kanalizaciju.

„Cesta je zbog curenja fekalija dugo bila oštećena, što nam je otežavalo svakodnevni život. Konačno smo, nakon toliko godina, dobili i kanalizaciju i lijepo asfaltiranu cestu, pa je i samo naselje ljepše“, naveo je Bolija.

Izgradnja separate kanalizacione mreže u ovom dijelu Švrakinog Sela, nastavak je velikog i skupog projekta koji se radi fazno i u skladu sa finansijskim mogućnostima.





180 novih parking mjesta na prostoru općine Novi Grad

Općina Novi Grad Sarajevo započela je u prošloj godini projekat izgradnje novih i proširivanja postojećih parkinga na svom području. U septembru 2019. godine potpisan je ugovor za izvođenje radova na ovom projektu sa odabranim izvođačem radova KJKP "Rad" d.o.o. u ukupnoj vrijednosti od oko 531.156 KM.

Ovim projektom predviđena je izgradnja blizu 250 novih mjesta za parkiranje na sedam lokacija na Saraj Polju, Alipašinom Polju, u Švrakinom Selu i Buća Potoku. U prošloj godini izgrađena su 63 nova parking mjesta u ulici Ante Babića, na Alipašinom Polju, u ulici Branislava Nušića kod škole "Aleksa Šantić", te kod zgrade Općine.

Sa početkom građevinske sezone nastavljena je izgradnja još oko 180 novih parking mjesta. Završeni su radovi na Trgu međunarodnog prijateljstva na Alipašinom Polju, a trenutno se radi na proširivanju i izgradnji novih parking mjesta u Prvomajskoj ulici, u Švrakinom Selu, nakon čega će uslijediti asfaltiranje plohe, a potom i ocrtavanje horizontalne signalizacije. Osim ovog, u naselju Švrakino Selo gradit će se još jedan manji parking u ulici Ali-bega Firdusa.

Manji parking gradit će se kod apoteke u ulici Adema Buće, u Buća Potoku, dok će u ulici Bajrama Zenunija, na Alipašinom Polju, biti izgrađen veći parking sa oko 120 mjesta za parkiranje. Za njegovu izgradnju Općinsko vijeće Novi Grad dalo je saglasnost na sjednici održanoj 26. septembra prošle godine.

Izgradnjom parkinga nastoji se ublažiti dugogodišnji problem nedostatka mjesta za parkiranje, te spriječiti parkiranje vozila na zelenim površinama i trotoarima.



NOVA PARKING MJESTA NA TRGU MEĐUNARODNOG PRIJATELJSTVA



NOVA PARKING MJESTA U PRVOMAJSKOJ ULICI



350 parking mjesta

U prethodnom periodu na prostoru općine Novi Grad izgrađeno je oko 350 parking mjesta. Na Trgu grada Prato na Dobrinji izgrađen je parking sa oko 100 mjesta za parkiranje, 150 parking mjesta izgrađeno je na Trgu međunarodnog prijateljstva, Trgu solidarnosti, na Alipašinom Polju i u Prijedorskoj ulici na Aneksu, kao i oko 130 mjesta kod Doma zdravlja "Novi Grad" na Otoci.

Osim izgradnje novih i proširivanja postojećih parkinga, Općina radi i na postavljanju nove rasvjete na parkinzima, kao i nove horizontalne i vertikalne signalizacije, a završena je rekonstrukcija kolovoza na svim parkinzima, koje već duži period niko ne održava.

Uređenje i obnova zapuštenih parkinga

Općina Novi Grad Sarajevo u prošloj je godini započela nekoliko projekata koji se odnose na uređenje i obnovu zapuštenih parkinga koje niko ne održava, i uvođenje više reda u samo parkiranje vozila. Prije svega sanirana su oštećenja na 58 parkinga u naseljima Dobrinja, Mojnilo, Saraj - Polje, Alipašino Polje, Otoka i Čengić Vila, nakon čega je na 26 velikih parkinga postavljena plastična horizontalna signalizacija sa vijekom trajanja i do pet godina, te modernizacija javne rasvjete.



Nova horizontalna i vertikalna saobraćajna signalizacija na još 60 parkinga

Na području općine Novi Grad u toku je izrada nove horizontalne i vertikalne signalizacije na parkinzima u naseljima Dobrinja, Saraj-Polje, Mojnilo, Švrakino Selo, Alipašino Polje, Otoka, Hrasno i Čengić Vila.

Na 60 parkinga izvršit će se iscrtavanje parking mjesta, postavljanje vertikalne saobraćajne signalizacije, te obilježavanje parking mjesta za osobe sa invaliditetom, kao i obilježavanje pješačkih prelaza i polja za usmjeravanje kretanja saobraćaja. Radove izvode građevinske firme SACOM d.o.o Sarajevo i PRO VIA d.o.o. Bijeljina.

Na parkinzima se vrši postavljanje plastične horizontalne signalizacije, iscrtavanje parking mjesta i pješački prelazi, obilježavaju se hladnom plastikom, koja ima produženu i znatno veću garanciju u odnosu na običnu boju, a uporedo s tim, vrši se i postavljanje saobraćajnih znakova refleksije, čiji je vijek trajanja od 10 do 12 godina.

Proteklih dana završeni su radovi na obilježavanju mjesta za parkiranje na parkinzima na Dobrinji, a pri kraju je obilježavanje parking mjesta u naselju Alipašino Polje. Vertikalna signalizacija postavljena je u naseljima Otoka, Hrasno, Čengić-Vila, Alipašino Polje, Saraj-Polje i u Olimpijskom Selu.

Za navedene radove iz općinskog budžeta izdvojeno je 399.896 KM.

Novi parking ispred apoteke u ulici Adema Buće

U ulici Adema Buće, kod apoteke JU „Apoteke Sarajevo“ izgrađen je parking.

S obzirom na činjenicu da veliki broj građana svakodnevno ima potrebu za odlaskom u apoteku, a samim tim i za parkiranjem vozila, ovim radovima izgradit će se osam dodatnih mjesta za parkiranje koja će biti označena, a čime će se dobiti više mjesta za parkiranje. U tom dijelu ulice uradit će se sanacija i asfaltiranje kolovoza širine oko 5 metara, koji ranije nije bio asfaltiran.

Radovi se izvode u okviru projekta izgradnje novih i proširivanja postojećih parkinga na prostoru općine Novi Grad, koji se realizira s ciljem rješavanja problema nedostatka mjesta za parkiranje.

U toku je izgradnja i parkinga u ulici Ali-bega Firdusa, u naselju Švrakino Selo, gdje postoji potreba za dodatnim brojem parking mjesta.





STANARIMA STAMBENE ZGRADE U ULICI TRG SOLIDARNOSTI BROJ 21 I 23 OLAKŠANO KRETANJE:

Ugradnjom lifta, starim i osobama sa invaliditetom omogućen izlazak iz stanova

Pri kraju je implementacija projekta izgradnje pristupnih rampi i liftova za osobe sa invaliditetom, kojeg Općina Novi Grad realizira kako bi osobama sa poteškoćama u kretanju, ali i starim i iznemoglim osobama olakšala pristup ulazima u stambenu zgradu, ali i izlazak vani.

Upravo u mjesnoj zajednici "Alipašino Polje A-1", u ulici Trg solidarnosti u toku su završni radovi na montaži jedne takve platforme, odnosno lifta koji će služiti osobama koje se kreću uz pomoć kolica i onima koje se zbog starosti, bolesti ili iznemoglosti otežano kreću. Lift je namijenjen za stanare ulaza broj 21 i 23, od kojih je većina starih osoba i osoba sa poteškoćama u kretanju.

Izgradnja vertikalne platforme obradovala je veliki broj stanara, a oko 300 ih živi u ovoj zgradi lift će uveliko olakšati pristup zgaradi, ali i Crvenom križu i drugim udruženjima koja se nalaze u ovoj stambenoj zgradi.

Pristup stambenoj zgradi vrlo je specifičan i nepristupačan, jer da bi se izašlo na ulicu neophodno je sići niz veliki broj nepristupačnih stepenica, što je osobama sa invaliditetom onemogućavalo izlazak vani. Sada će stanarima biti olakšan pristup, tako da više neće biti primorani ostajati u svojim stanovima zbog nemogućnosti silaska niz stepenice.

Upravo iz ovog razloga, 90-godišnja Janja Ilić do sada se rijetko

odlučivala izlaziti napolje, prvenstveno zbog starosti. Kaže nije se usuđivala pokušati silaziti niz stepenište, ali izgradnjom lifta sada joj je to omogućeno, kao i velikom broju njenih komšija.

Ugradnjom lifta obradovan je i Mirko Begić. Kaže da lift znači puno starijim osobama koje se teško kreću, posebno zbog stepenica koje se moraju koristiti kako bi se izašlo na ulicu. "Lift je bio velika potreba ovog dijela zgrade, pogotovo što je stepenište vrlo nepristupačno i nezgodno za starije ljude. Do sada smo nepokretne i bolesne komšije morali nositi niz stepenice, jer drugačije nije moglo", kaže Mirko.

Za izgradnju rampi i liftova za invalide, Općina je iz budžeta izdvojila 70.000 KM, a osim pristupne platforme u ulici Trg solidarnosti 21 i 23, lift za osobe sa invaliditetom izgrađen je i u objektu Osnovne škole "Avdo Smailović" u MZ "Dolac", kako bi se učenicima koji se kreću pomoću kolica olakšao pristup učionicama, njihovim roditeljima i drugim osobama sa otežanim kretanjem.

U sklopu ovog projekta, na ulazu u stambenu zgradu u ulici Ante Babića broj 5, u naselju Alipašino Polje, izgrađena je pristupna rampa za kretanje osoba sa invaliditetom. Njenom izgradnjom olakšan je svakodnevni život roditeljima koji su svoju djecu niz stepenice svakodnevno nosili zajedno sa invalidskim kolicima kako bi izašli vani, ali i drugim osobama koje za kretanje koriste kolica.



Privode se kraju radovi na trajnoj regulaciji rijeke Dobrinje

Pri kraju su radovi na projektu trajne regulacije korita rijeke Dobrinje. Građevinska firma „Orman“ d.o.o. izvodi radove na čišćenju i produbljivanju 150 metara riječnog korita, te betoniranju obalnih zidova u vrijednosti od oko 450.000 KM.

Radovi se izvode u ulici Hajrudina Šabanije, od naselja Mahala nizvodno prema mostu u ulici Aleja Bosne Srebrene. Na tom dijelu korito i obale rijeke su obrasle šibljem sa djelimično strmim obalama podložnim erodiranju, što utiče na normalan protok vode prilikom obilnih padavina, ugrožavajući okolne stambene objekte.

Radi se o nastavku trajne regulacije Dobrinjke čije je korito većim dijelom ranije regulisano, a nakon ovih radova, preostaje da se reguliše još oko 350 metara vodotoka do granice sa općinom Ilidža. S obzirom na to da prolazi kroz naselje gdje je jedan broj objekata izgrađen u neposrednoj blizini samog korita rijeke, u jednom dijelu radit će se trapezasto, a u drugom sandučasto korito, čime će se onemogućiti izlivanje rijeke iz korita u vrijeme većih padavina.

Ovim radovima uradit će se normalan profil sa vertikalnim armirano - betonskim obalnim zidovima, visine 4,30 metara, kao i betoniranje samog korita rijeke, kako bi se postigao normalan proticajni profil. Realizacija ovog projekta dio je aktivnosti koje Općina Novi Grad već nekoliko godina kontinuirano provodi kada je u pitanju regulacija i trajno rješavanje vodotoka na prostoru općine. Ulaganja u regulaciju vodotoka rijeka koje protičku kroz teritoriju općine Novi Grad i njihovih pritoka rezultirala su značajnim smanjenjem rizika od poplava.



Kraj plavljenju stambenih objekata ispod Novopazarske ulice, u Švrakinom Selu

Završen je još jedan infrastrukturni projekat u općini Novi Grad, kojim se rješava problem plavljenja stambenih objekata usljed neriješene oborinske kanalizacije. Izgrađena je oborinska kanalizacija kojom se rješava dugogodišnji problem plavljenja stambenih objekata i zemljišta koji se nalaze ispod ulice Novopazarska, na lokalitetu između ulica Kenana Demirovića i Avde Hodžića, u Švrakinom Selu.

Radovi su izvedeni u ulici Novopazarska do ulice Kenana Demirovića, gdje je izgrađeno oko 150 metara kišnog kanala DN300 mm, a ugrađeni su i šahtovi i slivničke rešetke za prikupljanje oborinskih voda koje su se usljed većih kišnih padavina slijevale niz ulicu i obližnju padinu, praveći probleme vlasnicima stambenih objekata.

Na ovom lokalitetu, zbog dugogodišnjeg plavljanja i nepostojanja kišne odvodnje, došlo je i do pojave nestabilnog terena, odnosno klizišta, koje je u Programu Zavoda za izgradnju Kantona Sarajevo za sanaciju u narednom periodu.

Kako bi se ovaj projekat realizirao i dobila saglasnost Zavoda za planiranje razvoja Kantona Sarajevo, prvobitno je bilo neophodno izvršiti korekciju Regulacionog plana „Švrakino Selo - Mlakve“. Izgradnjom kišne kanalizacije, sve vode sa šireg slivnog područja spojene su u kišnu kanalizaciju koja je ranije izgrađena u ulici Kenana Demirovića. Vrijednost radova je 79.782 KM, radove su izveli radnici građevinske firme „Harysco“ d.o.o., a nadzor nad izvođenjem radova vršilo je Kantonalno javno komunalno preduzeće „VIK“.





Završena separatna kanalizacija u Kodžinoj ulici

Nakon što je završena izgradnja separatne kanalizacione mreže u Kodžinoj ulici u Švrakinom Selu, dio ulice do spoja sa Novopazarskom ulicom je saniran i asfaltiran.

Tome je prethodilo polaganje oko 150 metara cjevovoda za fekalnu i oborinsku odvodnju. Ugrađene su visokokvalitetne cijevi i priključeni stambeni objekti na novoizgrađeni kanalizacioni sistem.

Izgradnja separatne kanalizacione mreže u ovom dijelu Švrakinog Sela, nastavak je velikog i skupog projekta koji se radi fazno, a za ovu fazu iz budžeta Općine izdvojeno je oko 260.000 KM, a projektom je obuhvaćena i ulica Vejsila Čurčića.

U proteklom periodu položeno je oko 880 metara cjevovoda za fekalnu i oborinsku kanalizaciju. Radovi su se izvodili u 2016. i u 2018. godini. Za te radove iz općinskog budžeta izdvojeno je oko 313.000 KM. U ulici Vejsila Čurčića izgrađeno je 300 metara oborinske i 250 metara fekalne kanalizacione mreže, za šta je izdvojeno 200.000 KM. U Kodžinoj ulici ranije je izgrađeno 330 metara fekalne i kišne kanalizacione mreže, a za te radove izdvojeno je 113.000 KM. Priključenje stambenih objekata na novoizgrađenu mrežu, kao i nadzor nad izvođenjem radova vršilo je Kantonalno javno komunalno preduzeće „Vodovod i kanalizacija“.

Projekat je značajan za veliki broj stanovnika koji su godinama imali problem sa improviziranom kanalizacionom mrežom, koja je prouzrokovala puno problema u ljetnom i zimskom periodu, te je izazivala i pojavu klizišta.



Kanalizaciona mreža u Brezanskoj i ulici Safeta Ahmetspahića, u Briješću

U novogradskom naselju Briješće počeli su radovi na izgradnji separatne kanalizacione mreže u dijelu Brezanske i ulice Safeta Ahmetspahića.

Realizacijom ovog značajnog infrastrukturnog projekta rješava se dugogodišnji problem velikog broja stanovnika jednog od najgušće naseljenih dijelova općine Novi Grad, koji nisu imali adekvatno izgrađenu kanalizacionu mrežu, a zbog čega se nije mogla raditi ni sanacija i asfaltiranje saobraćajnica.

Radove izvodi konzorcij firmi "Manjo" i "Bosman" d.o.o. Trenutno se u donjem dijelu Brezanske ulice vrše iskopi i izgradnja priključka fekalnog voda na postojeći recipijent, a nakon što se izvedu fekalni i oborinski priključci na recipijent u ulici Safeta Zajke, radit će se na izgradnji glavnih vodova od visokokvalitetnih poliesterskih cijevi DN500 i DN300. Paralelno sa tim, radit će se i kućni priključci, a priključenje stambenih objekata na novoizgrađenu kanalizacionu mrežu vršit će KJKP "Vodovod i kanalizacija" d.o.o. Sarajevo. Na spojevima dviju ulica vršit će se ugradnja slivničkih rešetki za odvodnju oborinskih voda sa ulice.

Projektom je predviđena izgradnja ukupno 400 metara duplog cjevovoda, a nakon čega će se steći uslovi da se izgradnja kanalizacione mreže nastavi kroz samo naselje.

Prvobitno će se uraditi 250 metara duplog cjevovoda, nakon čega slijede radovi i na preostaloj dionici projekta. Nakon izgradnje ovog kanalizacionog sistema može se krenuti i u sanaciju i asfaltiranje ulice Safeta Ahmetspahića, u kojoj živi veliki broj ljudi.

Okvirni sporazum za izgradnju separatne kanalizacione mreže u ulicama Safeta Ahmetspahića i Brezanska potpisan je 21. novembra 2019. godine, kao i sporazum za nastavak izgradnje separatne kanalizacione mreže u ulici Amira Krupalije, u naselju Buća Potok, ukupne vrijednosti oko 785.000 KM.



U Ahatovićima se gradi vodovodni sistem na koji će biti priključeno oko 200 stambenih objekata

U naselju Ahatovići u Mjesnoj zajednici "Dobroševići", u toku je izgradnja kilometar i po vodovodnog sistema, u vrijednosti od 439.000 KM.

Radi se o jednom od najznačajnijih infrastrukturnih projekata iz oblasti vodosnabdijevanja Dobroševića, kojeg Općina Novi Grad realizira već nekoliko godina, kako bi riješila jedan od najvećih problema koji su imali stanovnici ovog područja.

Radovi se izvode u ulicama Šehidska i Ranovačka, prvom fazom je predviđena izgradnja cjevovoda profila 150 mm u ulici Šehidska, nakon čega su radovi nastavljeni u Ranovačkoj ulici. Realizacijom ovog projekta, stanovnici ovog dijela općine Novi Grad, po prvi put će u svojim kućama dobiti vodu iz gradskog sistema vodosnabdijevanja, a na novi sistem bit će priključeno oko 200 stambenih objekata.

To su dijelovi općine u kojima imamo najveću ekspanziju stanovanja i izgradnje individualnih stambenih objekata. Ranije je Općina na tom prostoru izgradila dva rezervoara i cijeli sistem vodosnabdijevanja. Jedan dio stanovnika koristio je vodu sa postojećih lokalnih vodovoda, a nakon što se ovaj projekat realizira svi ti objekti će

preći na sistem gradske vodovodne mreže. Jedan od postojećih lokalnih vodovoda "Igrište" će se u potpunosti izbaciti iz funkcije. Na ovaj način lokalitet Donjih Mihaljevića, gdje imamo i dalje lokalni vodovod, na neki način, bit će rasterećen, pa će korisnici tog dijela, imati veće količine vode na raspolaganju, što je naročito važno u ljetnim mjesecima.

Implementacijom ovakvih projekata Općina Novi Grad uspijeva vodovodni sistem širiti u punom kapacitetu, tamo gdje je on najpotrebniji.

Početak realizacije ovog projekta, za stanovnike Dobroševića od velikog je značaja. „Ovo je za mještane naše mjesne zajednice veliki trenutak, poslije rata vodovodna mreža je bila znatno uništena, zahvaljujući Općini i općinskim sredstvima došli smo do rezervoara „Donji Mihaljevići“. Evo sada je došlo vrijeme da se rastereti jedan lokalni vodovod-„Djevojačke vode“, tako da će veliki broj domaćinstava biti priključen na rezervoar „Donji Mihaljevići“ i time se vodom snabdijevati iz gradskog vodovoda“, rekao je predsjednik Savjeta MZ „Dobroševići“ Ismet Žiga.



IZVOĐENJE RADOVA U ŠEHIDSKOJ ULICI



IZVOĐENJE RADOVA U RANOVAČKOJ ULICI

Kompletiran kilometar i 200 metara obnovljene vodovodne mreže u naselju Sokolje

Unatoč pandemiji koronavirusa koja je zahvatila našu, kao i većinu zemalja u svijetu, epidemiološka situacija nije zaustavila realizaciju projekata na području općine Novi Grad, a građevinska operativa izvodi radove na infrastrukturnim projektima koji se implementiraju na širem prostoru ove lokalne zajednice.

U Naselju heroja Sokolje nastavljena je rekonstrukcija stare dotrajale distributivne vodovodne mreže radovi su uslijedili nakon što je prethodno urađeno proširenje ulice Numan-paše Ćuprilića, glavne saobraćajnice u Naselju heroja Sokolje.

Rekonstruisano je oko 300 metara distributivnog cjevovoda, od spoja sa ulicom Zaima Imamovića do ulice Alije Prijepoljca Cunija, gdje je novoizgrađeni cjevovod spojen na ranije urađeni, a čime je kompletirano više od kilometar i 200 metara obnovljene vodovodne mreže u naselju Sokolje.

Ugrađene su visokokvalitetne daktilne cijevi DN150, urađeni su podzemni hidranti i čvorišta sa sponednim ulicama, te kućni priključci.

Prije početka radova, urađeni su privremeni priključci stambenih objekata na vodovodnu mrežu kako bi se mještanima ovog naselja osiguralo kontinuirano vodosnabdijevanje.

Rekonstrukcija vodovodne mreže u ovom dijelu naselja nastavak je projekta rekonstrukcije vodovodne mreže koja je krajem prošle godine urađena u ulici Zaima Imamovića do spoja sa ulicom Avde Palića u Zabrdju, čija je ukupna vrijednost investicije 342.810 KM.

Općina Novi Grad kontinuirano radi na izgradnji i rekonstrukciji vodovodno - distributivne mreže u ovom dijelu općine, budući da je vodovodna mreže na ovom području duži period bila u jako lošem stanju, zbog čega je dolazilo do čestih kvarova i curenja vode po cesti.

Osim ovih radova, rekonstrukcija još 350 metara dotrajalih instalacija u gornjem dijelu naselja urađena je u 2015. godini, a za te radove iz općinskog budžeta izdvojeno je 75.000 KM.



Kanalizaciona mreža nakon više od 40 godina postojanja naselja Boljakov Potok

Nakon više od 40 godina od nastanka, naselje Boljakov Potok prvi put ima kompletnu kanalizacionu mrežu, a ulicom Smaila Šikala više ne teku otpadne ni oborinske vode, kao ni voda iz Boljakovskog potoka.

Općina Novi Grad Sarajevo od jeseni radi na realizaciji jednog od najvećih infrastrukturnih projekata iz oblasti komunalne infrastrukture, u koji je investirano oko milion KM, a izgrađeno je oko 900 metara duplog kanalizacionog cjevovoda, gornji dio naselja spojen je u legalni kanalizacioni sistem, a nakon toga ulica je rekonstruisana i asfaltirana.

To je jedan mega projekat, jer je urađen ogroman cjevovodni sistem, u koji je povezan i Boljakovski potok, po kojem je ovo naselje dobilo ime. Izvor se nalazi neposredno pored stambenih objekata u gornjem dijelu ulice, a osim procjernih voda koje su se slijevale između gusto naseljenih kuća, i potok koji je tekao kao otvoreni kanal, sada je ucijevljen i više ne teče ulicom.

Kanalizacija u duplom sistemu, oborinska i otpadna provedena je od samog vrha ulice Smaila Šikala do dijela gdje se autobus okreće,

što je bio preduslov da se gornji dio ulice Adema Buće po prvi put sanira na adekvatan način.

Prije pet godina rađena je rekonstrukcija ulice Adema Buće, jedan dio tada nije bilo moguće sanirati, jer oborinske vode sa tog dijela nisu bile riješene. Nakon ovih radova i to će biti moguće. Ulica je nakon ovako obimnih radova u potpunosti rekonstruisana i obnovljena. Za oko milion konvertibilnih maraka izvedeno je blizu kilometar duplog kanalizacionog sistema, a ono što je najznačajnije, ovim projektom spriječena je mogućnost pojave klizišta, što je za ovako gusto naselje vrlo važno.

Osim izgradnje separatnog kanalizacionog sistema u sklopu ovog projekta je zamijenjen kompletan nosivi sloj ulice novim tamponom i ulica je asfaltirana, pri čemu je na nekoliko mjesta izvršeno proširenje i izgrađeni potporni zidovi, a urađeno je oko 120 kućnih priključaka na novoizgrađeni kanalizacioni sistem. Radove je izvela firma „Mibral“, dok je stručni nadzor vršio Zavod za izgradnju KS.





Stipendije za 536 uspješnih učenika i studenata

U vrijeme kada se naša zemlja suočava sa pandemijom koronavirusa, kao i veliki broj zemalja u svijetu, lijepa vijest obradovala je stipendiste Općine Novi Grad Sarajevo.

Naime, polovinom marta počela je isplata stipendija na njihove bankovne račune.

Općina Novi Grad Sarajevo u ovoj školskoj godini stipendira 536 učenika i studenata koji su ostvarili pravo na stipendiju, a za tu namjenu iz općinskog budžeta izdvojeno je više od pola miliona konvertibilnih maraka.

Zbog epidemiološke situacije, nažalost, ove godine po prvi put nije organizirana svečana dodjela ugovora o stipendiranju, te su ugovori otpremljeni putem pošte. Isplata stipendija vrši se retroaktivno, što znači da su u prvom dijelu isplaćene stipendije za prvih šest mjeseci, dok se preostali dio stipendija isplaćuje mjesečno.

Pravo na stipendiju ostvarili su učenici sa prosjekom ocjena 4,8 i više, kao i studenti sa najmanjom prosječnom ocjenom 8,0, te studenti tehničkih i medicinskih fakulteta, čiji je ostvareni prosjek ocjena minimalno 7,5.

Od ove godine Općina stipendira i učenike srednjih strukovnih škola koji se obrazuju po trogodišnjem programu rada i ostvaruju prosjek ocjena najmanje 3,0.



Mališani iz OŠ „Džemaludin Čaušević“ obilježili Dan nezavisnosti BiH

„Djeca se odmalena uče da vole Domovinu“

Povodom 1. marta – Dana nezavisnosti države Bosne i Hercegovine učenici Osnovne škole „Džemaludin Čaušević“ od prvog do trećeg razreda, u pratnji svojih učiteljica, položili su cvijeće na Centralno spomen - obilježje i odali počast šehidima i poginulim borcima općine Novi Grad, koji su svojim životima branili i odbranili našu domovinu od agresora.

Učiteljica prvog razreda Branka Kukić istakla je ovom prilikom, da su djeca donijela balone, žute i plave, u bojama koje su simbol naše domovine.

„Od prvog razreda osnovne škole učimo djecu da znaju kako smo dobili slobodu i da znaju poštivati sve tekovine, zahvaljujući ljudima čija imena čitamo na ovom spomen - obilježju. Iako su mali, radovali su se današnjem dolasku i svako je na svoj način odao počast, neko je proučio Fatihu, neko minutom šutnje, a neko poslao poljubac i mahao zastavicom. Od malena se uče da vole svoju Domovinu, da cijene ono što danas imamo. U tom duhu ćemo i dalje nastaviti“, kazala je Kukić.

Učenici starijih razreda škole „Džemaludin Čaušević“ posjetili su Historijski muzej, zatim Muzej ratnog djetinstva i muzej „Valter brani Sarajevo“, i na taj način obilježili Dan nezavisnosti - 1. mart. U školi

je održan i historijski čas, koncert i priredba, ali i izložba likovnih i literarnih radova. Svako je na svoj način dao doprinos da se obilježi ovaj značajni praznik.



Općina izdvojila 40.000 KM za nabavku tablet uređaja novogradskim osnovcima

Općina Novi Grad Sarajevo nabavila je tablet uređaje za učenike 15 novogradskih osnovnih škola, kako bi im barem malo olakšala praćenje on-line nastave.

Za tu namjenu iz općinskog budžeta izdvojeno je 40.650 KM.

Nakon odluke Ministarstva za obrazovanje, nauku i mlade KS o provođenju on-line nastave zbog vanredne situacije uzrokovane pandemijom koronavirusa, osnovni problem u odvijanju nastavnog procesa putem on-line platforme bilo je nepostojanje tehničkih uslova, obzirom da određen broj učenika nije posjedovao uređaje koji mogu podržati platformu on-line nastave.

“Problem sa nepostajanjem tehničkih uslova za pojedine učenike bio je istaknut naročito u porodicama sa dvoje ili više djece. Škole će na korištenje tablet uređaje dodjeljivati onima koji imaju problem sa praćenjem on-line nastave. Nadamo se da će se ova situacija što prije završiti i da ćemo djecu uskoro vidjeti u školskim klupama, tamo gdje oni najviše žele da budu”, kazao je načelnik Općine Novi Grad Sarajevo Semir Efendić.

Direktor OŠ “Behaudin Selmanović” Jasmin Marevac izrazio je zahvalnost kako za novac koji je izdvojen za nabavku tablet uređaja, tako i za sve druge aktivnosti koje Općina putem svojih službi provodi trenutno na terenu u borbi protiv korona virusa:

“Ja ovu korona krizu nazivam izazov. Mi smo u situaciji da moramo pokazati maksimum društvene odgovornosti i mislim da dobro to radimo. Mogu sa zadovoljstvom reći da smo jako uspješno odgovorili ovom izazovu, a pomoć koju smo dobili od Općine bit će nam od velikog značaja”, naglasio je Marevac.

I direktor OŠ “Avdo Smilović” Hasim Baždar istakao je da će tablet uređaji olakšati realizaciju nastave, zahvalio se i roditeljima koji su dali donacije za učenike, te je pohvalio nastavno osoblje škole i učenike koji su brzo savladali početne teškoće koje su imali.



Izložba "POETIKA OTISKA" u Galeriji Novi Grad



U Galeriji Općine Novi Grad od 12. marta do 1. aprila, mogla se pogledati izložba pod nazivom „Poetika otiska“ koja predstavlja izbor 25 grafičkih listova iz Zbirke umjetničkih djela Bošnjačkog instituta – Fondacije Adila Zulfikarpašića. Izložba je dio saradnje Bošnjačkog instituta i Općine Novi Grad Sarajevo, kojom se nastoje promovisati vrijednosti kulturnog naslijeđa Bosne i Hercegovine. Posjetitelji su imali priliku pogledati djela stvaralaca, zaslužnih za uključivanje bh. likovnosti u regionalne umjetničke tokove šezdesetih i sedamdesetih godina prošlog stoljeća.

Kustos izložbe Ermin Lagumdžija, inače mladi historičar umjetnosti, ističe da su ovakvi događaji odličan način da se promoviše bh. baština i umjetnost. „Izložili smo radove nekih od najznačajnijih bosanskohercegovačkih grafičara druge polovine 20. stoljeća. Različite poetike, različite grafičke tehnike, daju kvalitetan presjek dometa bh. grafike i općenito bh. likovnosti u drugoj polovini 20. stoljeća. Ovom izložbom se nastavlja saradnja bh. instituta sa Općinom Novi Grad Sarajevo i nakon što smo prošlih godina imali samostalne izložbe umjetnika, ovaj put izlažemo jednu grupnu izložbu zasnovanu na mediju, na grafičkom mediju, tako da imamo različite grafičke tehnike kojima Bošnjački institut, na neki način izlazi iz okvira prostora i ambijenta naše ustanove. Nadamo se da će se ova saradnja Općine i Instituta nastaviti i ubuduće“, naglašava Lagumdžija.

S obzirom na činjenicu da je Bosna i Hercegovina zemlja bogatog kulturno - historijskog naslijeđa, Općina Novi Grad nastoji dati svoj doprinos u podizanju svijesti o ulozi kulture u našem društvu, i približavanju umjetnosti široj publici. Stoga, već nekoliko godina realizira saradnju sa institucijama kulture kroz različite izložbe, radionice i posjete učenika kulturnim institucijama, s ciljem približavanja kulturnih sadržaja stanovnicima ove lokalne zajednice.

Na izložbi "Poetika otiska" su predstavljeni listovi Dževada Hoze, Halila Tikveše, Emira Dragulja, Mersada Berbera i drugih bh. grafičara. Oni su svojim radom postavili visoke standarde i izvršili veliki uticaj na buduće generacije grafičkih umjetnika u BiH i šire.



“Trideset godina savremene lingvističke bosnistike”

U sklopu manifestacije Dani Instituta za jezik 2020. godine i 48. godišnjice postojanja ove naučne institucije, u Galeriji Općine Novi Grad Sarajevo otvorena je izložba pod nazivom “Trideset godina savremene lingvističke bosnistike”, na kojoj je predstavljeno više od 350 knjiga na bosanskom jeziku napisanih tokom posljednjih 30 godina.

Tim povodom održano je i predavanje o temi “Izdanja iz savremene lingvističke bosnistike (1990 – 2020.)” u realizaciji Instituta za jezik Univerziteta u Sarajevu. U prepunoj sali Općinskog vijeća Općine Novi Grad o savremenoj lingvističkoj bosnistici govorili su direktor Instituta za jezik prof. dr. Alen Kalajdžija, dr. sc. Jasmin Hodžić i mr. sc. Zenaida Karavdić. Predavanju, a kasnije i otvaranju izložbe, su prisustvovali načelnik općine Novi Grad Semir Efendić, prof. Josip Baotić, prof. Hanka Vajzović, te brojni studenti i učenici sa svojim profesorima, nastavnicima i direktorima ustanova.

Načelnik Općine Novi Grad Sarajevo Semir Efendić je izrazio zadovoljstvo ostvarenom saradnjom sa Institutom za jezik, čiji tim, kako je kazao, radi veoma važan posao i prenosi prijeko potrebno znanje o našem bosanskom jeziku.

“Nama je zadovoljstvo da možemo podržati naučnu instituciju poput Instituta za jezik u onome što radi. Mi smo kao lokalna zajednica specifični, jer se većina naučnih i kulturnih institucija ne nalazi na teritoriji naše općine, ali nas to ipak ne spriječava da imamo projekte

saradnje. Riječ je o vrlo važnom pitanju za našu državu, pitanje jezika je možda jedno od najvažnijih, posebno kada se pogleda posljednji popis stanovništva. Najveća grupa ljudi u našoj državi se izjašnjava da govori bosanski jezik. S druge strane, mi imamo pitanje osporavanja našeg jezika, i vrlo je važno da se na najadekvatniji način govori o našem jeziku, a ko će to bolje raditi od naučnika i ljudi kojima je to cjeloživotni posao”, naglasio je načelnik Efendić.

Prva ukoričena knjiga o bosanskom jeziku objavljena 1990. godine

Direktor Instituta za jezik prof. dr. Alen Kalajdžija kaže da izložba predstavlja dio sadržaja u povodu 48. godišnjice Instituta za jezik, koja se obilježava 4. marta, Dana maternjeg jezika i Dana nezavisnosti Bosne i Hercegovine. Cilj izložbe je da skrene pažnju šire javnosti na naučni, društveni i politički status bosanskog jezika u BiH, ali i svijetu.

“Povezali smo period od 1990. do 2020. godine i predstavili našoj široj javnosti aspekte naučnog i istraživačkog rada u oblasti lingvističke bosnistike, tj. nauke koja se bavi proučavanjem bosanskog jezika. Ovom izložbom želimo poručiti javnosti da je bosanski jezik platforma na kojoj se okuplja sav naš narod, odnosno svi oni koji bosanski jezik doživljavaju kao svoj maternji jezik. Želimo dati doprinos širenju pozitivne svijesti o bosanskom jeziku”, rekao je Kalajdžija.





Priredbom „Čežnja za Bosnom“ u OŠ „Aleksa Šantić“ obilježen Dan nezavisnosti BiH i MZ „Saraj Polje“

Polaganjem cvijeća na spomen - obilježje i odavanjem počasti šehidima i poginulim borcima Armije Republike Bosne i Hercegovine, u dvorištu škole „Aleksa Šantić“, 28. februara, obilježeni su Dan nezavisnosti BiH i Dan Mjesne zajednice „Saraj-Polje“.

Cvijeće na spomen - obilježje položile su delegacije Općine Novi Grad Sarajevo, Savjeta MZ, boračkih udruženja, porodice poginulih boraca, rodbina i prijatelji, te učenici i nastavnici OŠ „Aleksa Šantić“ i političkih partija.

U velikoj sali škole „Aleksa Šantić“ priređen je bogat kulturno - umjetnički program posvećen 1. martu - Danu nezavisnosti Bosne i Hercegovine. Tom prilikom učenici su priredbom „Čežnja za Bosnom“, a direktorica škole Rasija Ibrahimović, svojim obraćanjem, uputili jasnu poruku o važnosti obilježavanja ovog značajnog datuma u historiji naše Domovine.

Direktorica Ibrahimović istakla je dužnost svih nas da mlade generacije učimo ljubavi i očuvanju jedine nam domovine Bosne i Hercegovine, dodajući da ova obrazovna ustanova, svake godine zajedno sa Općinom Novi Grad, obilježava Dan nezavisnosti države BiH i Dan mjesne zajednice i sjeća se najhrabrijih sinova koji su svoje živote ugradili u temelje suverene i nezavisne BiH.

„Prvi put smo manifestaciju ovog tipa održali 1993. godine, kada smo „pod zemljom“ učili i radili. Od tad je prošlo 28 godina, a ja sam uvijek u ovoj školi, u kojoj su odgojene mnoge generacije. Posebno me raduje činjenica da je u ovoj školskoj godini upisano sedam odjeljenja prvih razreda. One ratne '93. godine smo imali 1.400 djece. Sve uspjehe koje smo postigli, ne bismo mogli postići da nemamo jaku lokalnu zajednicu“, kazala je direktorica Ibrahimović.

U MZ „Saraj-Polje“ realizirani brojni projekti

Predsjednik Savjeta MZ „Saraj Polje“ Hamdija Lagumdžić, koji se obratio prisutnima naglasio je da je mjesna zajednica „Saraj Polje“ jedna od najvećih u Novom Gradu, sa oko 8.500 stanovnika, te da je zahvaljujući Općini Novi Grad, u protekloj godini doživjela niz značajnih promjena. Urađeno je dosta posla na stvaranju ugodnijeg ambijenta za življenje stanovnika. Prije svega, urađena je sanacija fasade oštećene od teškog ratnog razaranja na stambenom objektu u ulici Senada Mandića - Dende 2, 4 i 6. Obnovljen je i stavljen u funkciju vrtić „Žubor“, postavljena je nova javna rasvjeta, asfaltirane saobraćajnice, izgrađene pješačke staze, izvršena rekonstrukcija spomen - obilježja u dvorištu OŠ „Aleksa Šantić“, saniran je parking kod Doma zdravlja „Saraj Polje“. Također, obnovljen je krov stambene zgrade na Teheranskom trgu broj 7, sanirani su trotoari i postavljena zaštitna ograda, od spoja ulica Aleja Bosne srebrene prema ulici Ramiza Salčina, do Centra za slijepu i slabovidnu djecu i omladinu. Sanirano je i sportsko igralište na Teheranskom trgu, a pored škole izgrađen je park, te mnogi drugi projekti.

Akademija povodom 8. juna - Dana odbrane općine Novi Grad i bitke za brdo Žuč

Povodom obilježavanja 8. juna - Dana odbrane općine Novi Grad Sarajevo i 28. godišnjice bitke za brdo Žuč, u multimedijalnoj sali Općine Novi Grad, održana je akademija posvećena najhrabrijim sinovima i kćerima, onima koji su oslobodili Žuč, grad Sarajevo i Bosnu i Hercegovinu od agresora.

Akademiji su prisustvovali članovi porodica šehida i poginulih boraca, ratni vojni invalidi, demobilisani borci Armije RBiH, armijski generali, a među njima ministar za boračka pitanja Kantona Sarajevo Hajrudin Grabovica i Ismet Hadžić Mutevelija, predstavnici Općinskog vijeća, članovi boračkih udruženja i drugi građani.

Osmi juni proglašen kao Dan odbrane općine Novi Grad, jer je to jedan od najvažnijih datuma u historiji općine Novi Grad, tada se dogodila čuvena Bitka za brdo Žuč 1992. godine. Tada su pripadnici Armije Republike BiH i MUP-a pokazali agresoru da neće moći da uđe u Sarajevo i uradi ono što je naumio. U više akcija su htjeli presjeći Sarajevo i da zauzmu BiH, međutim, svojim viteškim borbama borci Armije RBiH nisu to dozvolili, pokazali su čudo bosanskog otpora.

Dan odbrane općine i slavne Bitke za brdo Žuč prisutnima je čititao općinski načelnik Semir Efendić. On je istakao da je najviše teritorije u toku agresije na Bosnu i Hercegovinu oslobođeno upravo 8. juna, na teritoriji Žuči, i da je to bila jedna od prvih pobjeda Armije RBiH. Naveo je da je Općina Novi Grad imala oko 25.000 vojnika, da je veliki broj njih dao svoje živote za odbranu države od agresora. „Mnogi su dali živote za slobodu u kojoj mi danas živimo, to je ono zbog čega smo dužni da ih se sjećamo, a ja sam za to da se uz to i često sjećamo naših slavnih pobjeda. Pobjeda je naš opstanak, pobjeda je što agresori nisu zauzeli niti uništili državu BiH, nisu to uspjeli zahvaljujući svim onim ljudima koji su se borili 8. juna i svih drugih datuma tokom agresije na BiH od 1992-95.godine. Stoga vas pozivam da ovakve datume sa ponosom obilježavamo i slavimo“, naglasio je načelnik Efendić.

Općina Novi Grad u protekle tri godine 8. juni obilježavala je na Golom brdu, uz prisustvo nekoliko hiljada ljudi, gdje je organiziran i zajednički iftar za posjetioce. Zbog pandemije koronavirusa ove godine masovnije okupljanje nije bilo moguće organizirati, ali je ovim povodom organizirana akademija, uz polaganje cvijeće na spomen-obilježja i sjećanje na najhrabrije sinove naše domovine.

Tokom akademije prisutni su imali priliku pogledati ratni snimak posjete prvog predsjednika i vrhovnog komandanta rahmetli Alije Izetbegovića 2. Viteškoj motorizovanoj brigadi, nastalom u martu 1994. godine, a koji je ovim povodom prvi put pokazan javnosti.



Dodijeljena priznanja „Zlatna plaketa odbrane općine Novi Grad Sarajevo“

Uručena su i općinska priznanja pojedinačna i kolektivna „Zlatna plaketa odbrane općine Novi Grad Sarajevo“. „Zlatna plaketa odbrane općine Novi Grad Sarajevo“ posthumno je dodijeljena rahmetli Muzaferu Mešiću, komandantu 1. bataljona 2. Viteške motorizovane brigade, dobitniku najvišeg ratnog priznanja „Zlatni ljiljan“, za izuzetne zasluge u odbrani općine Novi Grad Sarajevo i BiH u odbrambeno - oslobodilačkom ratu.

„Zlatna plaketa odbrane općine Novi Grad“ dodijeljena je i Muazu Suljagiću, komandantu 3. motorizovanog bataljona 2. Viteške motorizovane brigade, a kolektivna „Zlatna plaketa odbrane općine Novi Grad Sarajevo“ Odredu Teritorijalne odbrane Mojnilo. Plaketu je primio komandant Odreda Ejub Fako. Odred Mojnilo formiran je od grupa i dobrovoljaca brda Mojnilo na samom početku suprotstavljanja agresiji bivše JNA i srpsko-crnogorskog agresora s ciljem zaštite naselja i odbrane Sarajeva i Bosne i Hercegovine. Zona djelovanja odreda Mojnilo bila je od spoja ulice Milinkladska – Vrbovska do kuća Trapara na cesti Lukavica – Dobrinja. Odred je brojao 1.150 boraca raspoređenih u devet četa, a bio je među prvim jedinicama TO koja se suprotstavila agresoru i zaslužan je za odbranu voda Mojnilo.





28. godišnjica odbrane Dobrinje i Aerodromskog Naselja

Hrabri Dobrinjci bili su spremni dati živote za svoje naselje, grad i domovinu



Polaganjem cvijeća i učenjem Fatihe na spomen-obilježju u ulici Habibe Stočević, 21. juna, obilježena je 28. godišnjica odbrane Dobrinje i Aerodromskog Naselja od srpskog agresora. Na mjestu, gdje su se prije 28 godina vodile žestoke borbe za odbranu ovog naselja, okupile su se brojne delegacije, porodice šehida i poginulih boraca, predstavnici boračkih udruženja, Mjesne zajednice "Dobrinja – B", saborci, vijećnici Općinskog vijeća i učenici dobrinjske Osnovne škole "Osman Nuri Hadžić". Prisjetili su se teških, ali herojskih dana, presudnih za odbranu Dobrinje i grada od agresora.

Dobrinja je već 5. maja 1992. bila na udaru srpskih snaga, koje su po direktivi Ratka Mladića pojačane jedinicom JNA kasnije ušle transporterima i tenkovima u Aerodromsko Naselje. Ovdje su vođene danonoćne bitke za odbranu, ali je 21. juni, bio odlučujući, kada su borbe okončane odbranom ovog neosvojivog bedema. Ta odbrana je dio fenomena bosanskog otpora i herojstva Dobrinjaca, koji su se organizirali i hrabro suprotstavili agresoru. Mnogi su dali živote, dijelove tijela, teško ranjavani, ali nisu dali agresoru da pokori Dobrinju, i ona je 21. juna odbranjena. Taj dan je najznačajniji dan za odbranu Dobrinje, ovdje su neprijatelji bili i sa lijeve i sa desne strane, na taj dan odlučivalo se o sudbini oko 40.000 stanovnika Dobrinje. Ovdje su vođene odlučujuće bitke, uništavani agresorski transporteri i tenkovi.

Prisjećajući se tih dana, prisutni su podsjetili da je Dobrinja bila strateški cilj agresorske vojske, padom Dobrinje bi imali otvoren ulaz u grad Sarajevo. Tog 21. juna, odjekivale su detonacije svakih 30 sekundi. Napadi su trajali do kasno u noć. Međutim, srpsko-crnogorske formacije i formacije JNA dobro su se prevarile. Nisu računale na junačka srca Dobrinjaca, mladih heroja koji su bili spremni dati živote za svoje naselje, grad, domovinu.

Među dobrinjskim gazijama, koji su svojim tijelima zaustavili agresora bio je i Senad Poturak, "Zlatni ljljan", koji je poginuo 19. juna 1992. godine, braneći svoj grad i Domovinu.

Njegov sin Benjamin kazao je da svaka godišnjica boli, da je teško, ali da je ponosan, jer je njegov otac život dao za domovinu, kako bi nove generacije u miru i slobodi živjele.

Prisutnima su se obratili i pomoćnik Općinskog načelnika za boračka pitanja Tajib Delalić, Denis Muminović, predsjednik Udruženja "Prva dobrinjska brigada" i ratni komandant Zufer Klapuh.

Delegacije su položile cvijeće i na spomen-obilježje na mjestu masakra u ulici Hakije Turajlića, te na Centralno spomen-obilježje na Dobrinji.

DAN NEZAVISNOSTI BiH

Delegacija Općine Novi Grad odala počast i položila cvijeće na spomen-obilježjima



Čestitke povodom Dana nezavisnosti svim građankama i građanima u BiH i dijaspori uputio je Tajib Delalić, pomoćnik načelnika Općine Novi Grad za boračka pitanja, rad, socijalna pitanja i zdravstvo. Istaknuo je da je 1. mart jedan od najznačajnijih datuma u bosanskohercegovačkoj historiji. "To je izuzetan datum za BiH. Podjednako je važan i 15. april - Dan Armije RBiH, kada prvi put dobijamo svoju armiju, uz čiju pomoć se borimo za svoju državu. U toj borbi mnogi heroji su dali živote, samo na ovom spomen - obilježju ispisano je 1.945 imena naših branilaca. Ova zemlja natopljena je krvlju šehida, zahvaljujući kojima mi danas slobodno živimo. Stoga je trebamo čuvati i graditi kako najbolje umijemo", poručio je Delalić.

Povodom obilježavanja Dana nezavisnosti, delegacije su cvijeće položile i kod centralnog spomen-obilježja na mezarju Kovači i mezara prvog predsjednika Predsjedništva Republike BiH Alije Izetbegovića.


Delegacije su potom položile cvijeće i na spomen-obilježje kod Vječne vatre, u centru grada, kao i na spomenik djeci Sarajeva ubijenoj tokom proteklog rata od 1992-1995. te na spomen-obilježje ubijenim policajcima u Velikom parku i u spomen-parku Vraca.

U večernjim satima u gradskoj Vijećnici održana je svečanost povodom velikog praznika Bosne i Hercegovine - Dana nezavisnosti.



Na Dan nezavisnosti Bosne i Hercegovine delegacija Općine Novi Grad i Općinskog vijeća, te delegacije Grada Sarajeva, Kantona Sarajevo, boračkih udruženja i porodice šehida i poginulih boraca Armije RBiH, kao i delegacije političkih partija, položile su cvijeće na Centralno spomen-obilježje šehidima i poginulim borcima ispred zgrade Općine Novi Grad i podsjetile na činjenicu da je 1. mart jedan od najznačajnijih datuma u novijoj historiji države BiH, kada su se građani izjasnili za suverenu, nezavisnu i državu ravnopravnih naroda koji u njoj žive.

Uz sjećanje na najhrabrije sinove naše domovine, učenjem Fatihe i na drugi način, iskazali su zahvalnost našim šehidima i poginulim borcima, koji su svoje živote ugradili u temelje slobodne i nezavisne Bosne i Hercegovine.





Dan grada Sarajeva obilježen sjećanjem na najhrabrije sinove naše domovine

Povodom obilježavanja 6. aprila - Dana grada Sarajeva, delegacija Općine Novi Grad Sarajevo koju je predvodio Općinski načelnik Semir Efendić, zajedno sa delegacijom Općinskog vijeća Novi Grad i Grada Sarajeva položili su cvijeće na Centralno spomen - obilježje kod zgrade Općine Novi Grad i odali počast šehidima i poginulim borcima Novog Grada, Sarajeva i države BiH, koji su svoje živote ugradili u nezavisnu i suverenu Bosnu i Hercegovinu.

Ovom prilikom načelnik Efendić građanima Sarajeva čestitao je 6. april, datum koji za grad Sarajevo ima puno simbolike.

„I najteži i najsvjetliji trenuci historije su se nekako dešavali 6. aprila. Ove godine u neobičnim okolnostima, zbog proglašenog stanja prirodne i druge nesreće izazvane koronavirusom, imamo jako mali broj prisutnih, ali se moramo strpiti, ako je to za dobrobit svih nas. Mi smo položili cvijeće, prisjetili se svih onih čija imena su ispisana na ovom spomen – obilježju ispred zgrade općine Novi Grad“, kazao je načelnik Efendić.

Zamjenik predsjedavajućeg Općinskog vijeća Novi Grad Jasmin Šaljić, istakao je da su i predstavnici Općinskog vijeća položili cvijeće i odali počast svim poginulim pripadnicima Armije RBiH, MUP-a i civilnim žrtvama rata u periodu 1992 – 1995. godine.

„Opsada našeg grada je najduža u historiji čovječanstva. U toj opsadi su nas držali vojnici takozvane JNA, koji su nekoliko mjeseci ranije



zauzeli položaje, a onda su naprasno, preko noći, predali položaje i svo naoružanje jednoj strani, i tako formirali tzv. vojsku Republike Srpske koja je terorizirala naš grad pune četiri godine. Do 15. aprila je dan teritorijalne odbrane, sve dalje je čudo bosanskog otpora i historija“, rekao je Šaljić.

Treba napomenuti da je 6. aprila 1992. godine, tadašnja Evropska zajednica priznala Republiku Bosnu i Hercegovinu kao nezavisnu državu. Nažalost, dok se zastava sa ljiljanima vihorila ispred zgrade UN-a u New Yorku, srpski agresori granatirali su stari dio grada i otpočeli najdužu blokadu jednog grada u historiji ratovanja, olimpijskog grada Sarajeva i agresiju na državu BiH.

Obilježena 28. godišnjica od pogibije narodnog heroja Safeta Hadžića

Polaganjem cvijeća na Centralnom spomen – obilježju brigadnom generalu Armije RBiH rahmetli Safetu Hadžiću ispred zgrade Općine Novi Grad Sarajevo, obilježena je 28. godišnjica pogibije heroja odbrambeno - oslobodilačkog rata, dobitnika najvišeg ratnog priznanja "Zlatni ljiljan" i njegovih saboraca.

Učenjem Fatihe i minutom šutnje odata je počast legendarnom pokretaču otpora agresiji, čije će ime ostati zapisano u historiji bh. odbrambeno-oslobodilačke borbe. Cvijeće na spomen-obilježje položili su predstavnici Općine Novi Grad, delegacije Grada Sarajeva, predstavnici boračkih udruženja, a obilježavanju su prisustvovali i članovi porodice Hadžić, prijatelji i saborci rahmetli Safeta Hadžića.

Najstarija Safetova kćerka Almira Hadžić - Gološ iskazala je zahvalnost Općini što je uprkos svim dešavanjima koja su nas zadesila našla načina da se godišnjica simbolično obilježi: "Moram reći da ipak mislim da se dovoljno sjećamo naših heroja zahvaljujući istinskim patriotama koji su iza njih ostali. Da bi tako i ostalo bilo bi dobro sjećanje na naše heroje i cijeli taj hrabri ratni period izučavati više i kroz obrazovni sistem", istakla je.

Safet Hadžić je zajedno sa saborcima Nerminom Zeljkovićem, Seadom Velićem, Fahrudinom Čavčićem, Almirom Islamovićem i Senadom Čirićem izgubio život na kapiji preduzeća "Pretis", prilikom pokušaja da iz kruga tog preduzeća izvuče naoružanje i municiju neophodnu za odbranu Sarajeva.

Cvijeće je položeno i na mjestu pogibije, te Šehidskom mezarju Kovači.



DAN ŠEHIDA I POGINULIH BORACA U OPĆINI NOVI GRAD

Nismo i nećemo zaboraviti najvrednije sinove naše domovine!

Drugog dana Ramazanskog bajrama koji se obilježava kao Dan šehida, u Općini Novi Grad obilježen je sjećanjem na najhrabrije sinove naše domovine, koji su svoje živote dali za slobodnu i nezavisnu državu Bosnu i Hercegovinu.

U nastojanju da iskaže poštovanje prema njima, najzaslužnijim bh. sinovima za odbranu domovine od agresora, i ove godine zajedno sa Udruženjem "Organizacija porodica šehida i poginulih boraca", uz pridržavanje mjera zaštite zbog koronavirusa, obilježen je Dan sjećanja na šehide i poginule borce.

Tim povodom predstavnici Općine zajedno sa članovima porodica, rodbinom i prijateljima poginulih boraca Armije RBiH, te vijećnicima Općinskog vijeća Novi Grad, obišli su mezaristane na području Novog Grada, gdje je proučen Ja`sin šerif, a centralna manifestacija održana je na šehidskom mezarju u Buća Potoku.

Učenjem Fatihe, prisutni su se sjetili heroja odbrambeno - oslobodilačkog rata i odali im dužno poštovanje, a Hatma dova proučena je u Gazi Husrev-begovoj džamiji.

Općina Novi Grad baštini sjećanje na najvrednije sinove naše domovine, tako će biti i u narednim godinama, jer šehidi i poginuli borci nisu, niti će ikada biti zaboravljeni.

Sa ovog skupa poručeno je, da neće dozvoliti da ih bilo šta, pa ni pandemija, spriječi da odaju počast našim bosanskim šehidima i poginulim borcima koji su dali svoje živote za odbranu BiH i slobodu u kojoj danas živimo.



Sjećanje na žrtve masakra u azerbejdžanskoj pokrajini Hodžali

Polaganjem cvijeća na spomenik žrtvama genocida Srebrenice i masakra počinjenog u gradiću Hodžali, u regiji Nagorno-Karabah u Republici Azerbejdžan, 21. februara, u Parku prijateljstva, na Dobrinji, obilježena je 28. godišnjica i sjećanje na žrtve masakra u Hodžaliju. Cvijeće su položile delegacije ambasade Azerbejdžana u Bosni i Hercegovini sa ambasadorom Eldarom Hasanovim, Općine i Općinskog vijeća Novi Grad Sarajevo sa načelnikom Semirom Efendićem, te studenti sarajevskog Univerziteta porijeklom iz Azerbejdžana. Odali su počast žrtvama genocida u Srebrenici i žrtvama masakra počinjenog nad civilima u azerbejdžanskoj pokrajini Hodžali.

"26. februar je za azerbejdžanski narod dan tragedije, na taj dan 1992. godine iznenada je okupirana pokrajina Hodžali, ubijeno je 630 ljudi, od kojih 130 djece. Dvadeset posto azerbejdžanske teritorije okupirano je od strane jermenskih oružanih snaga. Sve međunarodne norme su na strani Azerbejdžana, kao i historijske činjenice. Izgubili smo mnogo ljudi i nećemo dozvoliti da jedan metar naše teritorije bude okupiran. Azerbejdžan nikada neće zaboraviti da je upravo narod BiH prihvatio Rezoluciju, visoko cijenim današnju prisutnost univerzitetskih profesora, studenata, načelnika Općine Novi Grad i ostalih koji su došli da zajedno obilježimo ovaj datum. Osjetili smo da nismo sami", izjavio je Eldar Hasanov, ambasador Republike Azerbejdžan u BiH.



Načelnik Semir Efendić podsjetio je da je 2012. godine na Dobrinji otvoren Park prijateljstva Bosne i Hercegovine i Azerbejdžana u kojem se nalazi spomenik žrtvama genocida u Srebrenici i regiji Hodžali u Azerbejdžanu. Izgradnju Parka i spomenika finansirao je Fond „Heydar Aliyev“ iz Republike Azerbejdžan, a otvorila ga je Lejla Aliyev, kćerka predsjednika Republike Azerbejdžan.

Delegacija Općine Novi Grad, zajedno sa drugim općinama iz BiH, početkom augusta 2018. godine boravila je u posjeti Gradu Bakuu, gdje su se sastali sa predstavnicima općina iz njihovog glavnog grada, a u decembru iste godine, načelnici pet općina iz Bakuu boravili su u višednevnoj posjeti našoj zemlji i Općini Novi Grad Sarajevo, kada su zajedno sa predstavnicima naše Općine posjetili Park prijateljstva dvije države u naselju Dobrinja.



Uzimanje briseva od 15. jula i u Domu zdravlja „Novi Grad“ na Otoci



Stanovnici općine Novi Grad Sarajevo, od srijede, 15. jula, briseve grla i nosa, kao i uzorke drugog biološkog materijala moći će davati u Domu zdravlja „Novi Grad“ na Otoci, i za ovu vrstu laboratorijskih nalaza više neće morati ići na dva kraja grada.

Analiza briseva, grla, nosa, usne šupljine, dubokih rana, urinokulture, vršit će se u ambulanti za prijem biološkog materijala, na trećem spratu DZ „Novi Grad“. Stavljanje u funkciju trećeg punkta za prijem biološkog materijala i izdavanje nalaza Zavoda za javno zdravstvo KS ozvaničili su načelnik Općine Novi Grad Sarajevo Semir Efendić, direktorica Zavoda za javno zdravstvo KS Aida Pilav i direktor JU Dom zdravlja KS Muhamed Ahmić, sa saradnicima.

„Do sada su naši građani za ovu vrstu zdravstvene usluge morali ići u Dom zdravlja na Ilidžu ili u Stari Grad, što je poprilično daleko. Općina je izdvojila oko 10.000 KM da bi se taj prostor osposobio i opremio kako bi uposlenici Zavoda za javno zdravstvo mogli početi sa radom, a evo već od srijede će naši građani na ovom mjestu moći uraditi nalaze za koje su ranije morali ići u druge općine. Ovo je centralni dio grada, ako se posmatra geografski, tako da će najvećem broju naših građana odgovarati ova lokacija, nego dosadašnja praksa“, kazao je načelnik Efendić.

Ideja da se jedan dio obnovljenog i proširenog DZ „Novi Grad“ iskoristi za otvaranje šaltera za uzimanje briseva grla, nosa i drugih uzoraka koje Zavod za javno zdravstvo KS analizira u svojim laboratorijama, postoji više od dvije godine, prilikom rekonstrukcije Doma zdravlja „Novi Grad“. Od tada je Općina Novi Grad vodila aktivnosti

sa Zavodom za javno zdravstvo kako bi se u funkciju stavio prostor za uzimanje i analizu mikrobioloških uzoraka.

Aida Pilav, direktorica Zavoda za javno zdravstvo Kantona Sarajeva istakla je značaj otvaranja jedne ovakve ambulante u općini sa najvećim brojem stanovnika.

„Sretni smo jer je Zavod za javno zdravstvo KS zajedno sa JU Dom zdravlja KS i uz finansijsku podršku Općine Novi Grad otvorio treći punkt u Sarajevu za uzimanje briseva grla, nosa, i drugog biološkog materijala. Do sada su u Kantonu Sarajevo postojala samo dva punkta na dva kraja grada, u ulici Avdage Šahinagića u prostorijama Zavoda za javno zdravstvo KS, u općini Stari Grad i u DZ na Ilidži. Sada mi praktično u središtu grada otvaramo još jedan punkt, što je jako značajno za naše stanovništvo, jer im približavamo zdravstvenu uslugu. Time smanjujemo mobilnost pacijenata i omogućavamo im pružanje usluga što bliže mjestu stanovanja“, izjavila je direktorica Pilav.

Ambulanta za prijem biološkog materijala (brisevi, urinokulture) i izdavanje nalaza, uzorke će uzimati od 8 do 12 sati, a izdavanje nalaza vršit će od 12 do 15 sati.



Općina Novi Grad i ove godine sufinansira troškove vantjelesne oplodnje, otvoren poziv bračnim parovima

Općina Novi Grad Sarajevo i ove će godine sufinansirati troškove postupka vantjelesne oplodnje za bračne parove koji nastoje postati roditelji. Za tu namjenu iz općinskog budžeta izdvojeno je 100.000 KM.

Projekat se realizira putem općinske Službe za boračka pitanja, rad, socijalna pitanja i zdravstvo, a program se realizira već treću godinu. Do sada je pravo na sufinansiranje troškova medicinski potpomognute oplodnje ostvarilo 136 bračnih parova. Na taj način ova lokalna zajednica nastoji im olakšati da postanu roditelji.

Poziv za podnošenje zahtjeva za ostvarivanje prava na ovu vrstu podrške, bit će otvoren od 1. do 30. juna.

Prve godine iz budžeta Općine bila su osigurana sredstva u iznosu od 50.000 KM, međutim kako se pokazao veći interes bračnih parova za ovu vrstu pomoći, prošle i ove godine osigurano je po 100.000 KM.

Svi zainteresirani građani uz zahtjev trebaju dostaviti odgovarajuću medicinsku dokumentaciju, kao i ostalu dokumentaciju navedenu u zahtjevu. Mogu se prijaviti buduće majke starosti do 42 godine, a jedan od uslova je i da je jedan od supružnika najmanje tri godine stanovnik općine Novi Grad.

Cilj je da izdvojena sredstva podjednako budu podijeljena onima kojima je ova vrsta pomoći potrebna.

Praksa većine zemalja u Evropskoj uniji je da država plaća pokušaje medicinski potpomognute oplodnje, ali u Bosni i Hercegovini još uvijek nema zakona kojim se to reguliše, iako po nekim procjenama i statistikama veliki broj bračnih parova imaju problem sa začecem.

S obzirom na ekonomsku situaciju, parovi koji se odluče dobiti potomstvo na ovaj način za svaki pokušaj vještačke oplodnje moraju izdvojiti velika finansijska sredstva na ime plaćanja troškova postupka nadležnim zdravstvenim ustanovama.

Sufinansiranjem troškova postupka vantjelesne oplodnje Općina Novi Grad nastoji bračnim parovima olakšati da postanu roditelji.

Pozivaju se parovi sa područja općine Novi Grad Sarajevo koji su u bračnoj ili vanbračnoj zajednici, a koji su zainteresovani za ostvarivanje prava na sufinansiranje troškova vantjelesne oplodnje, da iskažu interes za nevedeni program podnošenjem zahtjeva putem protokola Općine Novi Grad Sarajevo.

Sve dodatne informacije građani mogu dobiti u nadležnoj općinskoj Službi, pozivom na telefonski broj: 033 29 11 67.

POLOŽEN KAMEN TEMELJAC

U naselju Rječica gradit će se džamija "Mesudija"

Vjernici naselja Rječica, u općini Novi Grad Sarajevo, pamtit će petak, 29. dan ramazana, odnosno 22. maj 2020. godine, po postavljanju kamena temeljca za izgradnju džamije "Mesudije".

Postavljanju kamena temeljca prisustvovali su zamjenik reisu-luleme muftija sarajevski dr. Enes-ef. Ljevaković, direktor Vakufske direkcije dr. hafiz Senaid Zaimović, glavni imam MIZ Sarajevo doc. dr. hafiz Kenan-ef. Musić, predsjednik IO Medžlisa g. Jusuf Zahiragić, sekretar Medžlisa g. Muhamed Memić, načelnik Općine Novi Grad mr. Semir Efendić, pomoćnici glavnog imama mr. hafiz Ammar-ef. Bašić i Elvedin-ef. Klisura, imam džemata Mevludin-ef. Čosić, te vakifi ovog projekta.

Više od 5.000 stanovnika naselja Rječica do sada nisu imali gdje da obavljaju molitvu, niti su njihova djeca imala mekteb. Džamija "Mesudija" će djeci naselja Rječica osigurati mekteb koji je početna i temeljna odgojno-obrazovna ustanova na nivou džemata u okviru Islamske zajednice.

Postavljanjem kamena temeljca označen je početak prve faze izgradnje džamije. Završetak radova planiran je za maj 2021. godine (Ramazan 1442. godine po H.)

Investitor projekta vrijednog 600.000 KM je vlasnik Penny grupacije Mesud Hrbat sa suprugom Suvadom i svojom porodicom.





Općina Novi Grad za pripadnike boračke populacije osigurala besplatnu rehabilitaciju na Olimpijskom bazenu Otoka

Općina Novi Grad Sarajevo osigurala je besplatnu sportsku rehabilitaciju i vježbanje u vodi za pripadnike boračke populacije sa svog područja, koja će se realizirati na Olimpijskom bazenu Otoka. Tim povodom načelnik Općine Semir Efendić potpisao je sa direktorom JP „Olimpijski bazen Otoka“ d.o.o. Sarajevo Enesom Peštekom sporazum o realizaciji ovog programa.

Načelnik Efendić kazao je da će Općina prvi put sa Olimpijskim bazenom raditi program podrške i rehabilitacije za boračku populaciju za 600 učesnika. „Vrijednost ovog projekta je 25.000 KM. Pored toga, Olimpijski bazen će uložiti svoje napore i dio svojih kapaciteta kako bismo ovoj populaciji ponudili kvalitetan program koji je bio prijedlog Koordinacije boračkih udruženja Općine Novi Grad i meni je drago da će se potpisivanjem sporazuma steći uslovi da se krene sa realizacijom ovog programa“, kazao je načelnik Semir Efendić.

Direktor JP „Olimpijski bazen Otoka“ Enes Peštek, zahvalio je rukovodstvu Općine koje je imalo razumijevanja i prepoznalo dobrobit i pozitivnost ovog projekta. „Sportska rehabilitacija, vježbanje u vodi, boračke populacije i boraca sa područja općine Novi Grad je nešto što će doprinijeti poboljšanju njihovog zdravstvenog stanja, ipak su to ljudi koji su tokom agresije na BiH izgubili određene dijelove tijela, te će jačanjem mišićnih grupa poboljšati svoj zdravstveni status“, rekao je Peštek.

Program rehabilitacije obuhvata grupne pilates vježbe, individualnu rehabilitaciju u vodi sa hidro masažerima u malom bazenu, rekreativno plivanje u velikom bazenu i upotrebu saune. Realizaciju grupnih programa, nadzor individualne rehabilitacije i rekreacije vršit će profesori tjelesnog i zdravstvenog odgoja.

Nizom naučnih istraživanja potvrđeno je da redovna fizička aktivnost pozitivno utiče na fizičko, ali i mentalno zdravlje čovjeka. Upravo zbog toga, vježbanje u vodi kao rehabilitacijsko sredstvo ima vrlo široku primjenu.

Predsjednik Koordinacije boračkih udruženja Općine Novi Grad Jasmin Smječanin rekao je da Općina Novi Grad prva realizira ovakav projekat, te da bi volio da se i ostale općine uključe, čisto zbog pomoći boračkoj populaciji. „U današnje vrijeme pandemije i vrijeme kad ljudi ne mogu da odu u banju ili na more, mislim da će ovaj vid rehabilitacije puno koristiti boračkoj populaciji“, kazao je Smječanin.

On je pozvao sve pripadnike boračke populacije sa područja Novog Grada, koji nisu do sada popunili prijavni obrazac, da isti mogu preuzeti na prijavnici Olimpijskog bazena Otoka, kako bi bili uvršteni u projekat sportske rehabilitacije i vježbanja u vodi na bazenu.

Za sve informacije zainteresirani se mogu javiti u Službu za boračka pitanja, rad, socijalna pitanja i zdravstvo Općine Novi Grad, na telefonski broj 291 353, kontakt osoba Asmir Mešić.

EKIPE "LOKOMA" U AKCIJI

Uređuju zelene površine izvan stambenih blokova koje ne održava KJKP "Park"

Ekipe javnog preduzeća "Lokom" rade na čišćenju i uređenju zelenih površina izvan stambenih blokova, uz riječna korita, saobraćajnice, igrališta i pristupne puteve u novogradskim naseljima, koji su obrasli travom, korovom i šibljem, a niko ih ne održava.

Inače, preduzeće "Lokom" održava zelene površine u Centru "Safet Zajko", Sportsko - rekreacionom centru "Srce" u Buća Potoku, zatim kružne tokove na području općine Novi Grad, korito rijeke Dobrinjke, kao i pojase uz lokalne saobraćajnice, gdje za tim postoji potreba, ali i pojase uz magistralne ceste, gdje upravitelji nažalost ne vrše svoju obavezu održavanja, kao što su ulice Safeta Zajke i Safeta Hadžića.

Održavanje zelenih površina unutar naselja i uz glavne gradske saobraćajnice obaveza su Kantonalnog javnog komunalnog preduzeća "Park".

Protekle sedmice ekipe "Lokoma" radile su na uređenju korita i zelenog pojasa uz riječno korito Dobrinje, nizvodno od granice sa manjim bh. entitetom do spoja sa općinom Ilidža, gdje su vršili košenje i uklanjanje trave, te uklanjanje otpadaka koje građani ostavljaju iza sebe. Nakon toga, nastavili su uređenje površina uz magistralne saobraćajnice, kružne tokove, pristupne puteve, prilaze mjesnim zajednicama i drugim objektima od javnog značaja. Radili su na uklanjanju i odvozu otpadaka, košenju trave pored lokalnih saobraćajnica, potkresivanju drveća i žive ograde uz pristupne puteve, te zalijevanju cvjetnih površina.

Radnici "Lokoma" kosili su travu i oko sportskog igrališta u ulici Potur Šahidijina i spomen - obilježja ubijenoj djeci MZ "Alipašin Most -1", te uz cestu u ovom dijelu naselja.

Također, uređene su površine uz magistralne ceste u ulici Safeta Zajke, od ulica Esada Midžića do ulice Smaje Šikala, u Boljakovom Potoku, zatim pojas uz ulicu Safeta Hadžića, u Švrakinom Selu, prostor oko mjesnih zajednica "Briješće" i "Naselje heroja Sokolje", kao i kružni tokovi na Mojmilu, LOT-u 2 C, te kružni tokovi u ulici Džemala Bijedića i ulici Safeta Zajke u Buća Potoku.





PODUZETE MJERE ZA SPREČAVANJE ŠIRENJA KORONAVIRUSA

Općina Novi Grad Sarajevo i prije proglašenja stanja prirodne nesreće zbog pandemije koronavirusa, putem Štaba civilne zaštite Općine Novi Grad Sarajevo i Službe civilne zaštite Općine Novi Grad Sarajevo poduzela je niz preventivnih mjera i radnji za sprečavanje širenja koronavirusa i zaštite zdravlja stanovništva. Formiran je Krizni štab na području općine Novi Grad koji će biti aktivan i na raspolaganju 24 sata, u koordinaciji sa Domom zdravlja, Crvenim križem, Policijskom upravom i ostalim službama Civilne zaštite na nivou Kantona Sarajevo i FBiH, da bi se poduzele sve aktivnosti u cilju prevencije epidemije.

Doneseni su i određeni zaključci kojima su usaglašene mjere koje su se provodile u kontinuitetu. Prije svega, te mjere odnose se na nabavku sredstava za dezinfekciju i zaštitne opreme za Dom zdravlja „Novi Grad“, jedan od najvećih domova zdravlja u Kantonu Sarajevo, koji opslužuje više od 120.000 stanovnika, a koji nije bio opremljen neophodnom zaštitnom opremom za rad sa pacijentima oboljelim od COVID-a 19. Općina je za potrebe DZ nabavila zaštitne kape, maske, naočale, rukavice, ogrtače, sa sredstvima za dezinfekciju. Kako bi se omogućilo pranje medicinskih uniformi za uposlenike DZ „Novi Grad“ angažovana je jedna praonica odjevnih predmeta za pranje medicinskih uniformi, a za pranje opreme medicinskog osoblja koje je bilo u kontaktu sa osobama pozitivnim na COVID 19 obezbijeđeni su uređaji za pranje.

Zaštitni materijal i sredstva za dezinfekciju osigurani su i za potrebe Crvenog križa „Novi Grad“, Gerontološkog centra, javnih kuhinja na području općine Novi Grad i Policijske uprave „Novi Grad“, kao

i škole na području općine. Na terenu je bilo angažovano oko 140 ljudi kojima su kupljene uniforme, zaštitna oprema, oprema za dezinfekciju, a oni su sve vrijeme vršili dezinfekciju najfrekventnijih javnih površina na prostoru svih mjesnih zajednica.

Osigurana zaštitna oprema i trijažni šator za DZ „Novi Grad“

Općina Novi Grad, putem Službe civilne zaštite, osigurala je Domu zdravlja „Novi Grad“ određene količine zaštitne opreme za provođenje mjera prevencije od epidemije koronavirusa, zaštitne maske, naočale, rukavice, ogrtače, te sredstva za dezinfekciju.

Također, za potrebe Doma zdravlja na Otoci, osiguran je i trijažni šator, u kojem se vrši pregled pacijenata, kao mjera zaštite od koronavirusa. Na ovaj način će se pacijenti ciljano kretati kroz zdravstveni sistem (zdravstvene ustanove), a medicinski tim razvrstava pacijente prema stepenu hitnosti, mjeri se tjelesna temperatura pacijenata i daje im se epidemiološka anketa koju popunjavaju.

Dr. Abel Baltić, direktor DZ „Novi Grad“ zahvalio je Općini i Općinskoj civilnoj zaštiti koji su imali razumijevanja i djelovali promptno. „Zadovoljan sam brzinom kojom su reagovali. Ideja je bila da postavimo šator kao trijažno mjesto i da na taj način pokušamo zaustaviti koronavirus da ne uđe u naše zdravstvene ustanove. Da ne bi došlo do panike kod naših sugrađana, i da ne bih bio pogrešno shvaćen, nije korona baš toliko opasna koliko se misli. Mi želimo maksimalnim mjerama razvući vrijeme pojave korone u KS. Znači, cilj nam je reagovati i ne zatrpiti zdravstveni sistem“, rekao je dr. Baltić.





Zaštitne maske i rukavice za uposlenike tržnih centara

Zaštitne maske i rukavice uručene su i uposlenicima deset velikih tržnih centara na području općine i Četvrtje PU „Novi Grad“.

„Osigurali smo zaštitne maske i rukavice za sve uposlenike deset velikih tržnih centara, čiji je rad značajan za nas i naše građane da mogu doći do osnovnih životnih namirnica. Pored toga smo, dodatno, 2.500 zaštitnih maski uručili Domu zdravlja i Četvrtjoj policijskoj upravi koja također ima određenu potrebu za njima zbog kontakta sa velikim brojem građana“, kazao je načelnik Općine Novi Grad Semir Efendić.

Donirana zaštitna oprema će biti od pomoći i policijskim službenicima Četvrtje policijske uprave u svakodnevnom obavljanju poslova, pogotovo u vrijeme kada je na ulicama prisutan veliki broj migranata, a policijski službenici su s njima u svakodnevnom kontaktu i moraju biti zaštićeni.



Predstavnici Štaba civilne zaštite posjetili Gerontološki centar

Štab civilne zaštite Općine Novi Grad Sarajevo tokom provođenja mjera sprečavanja širenja koronavirusa i zaštite zdravlja stanovništva, posebnu pažnju posvetio je Gerontološkom centru u Nedžarićima, u kojem je smješteno oko 350 starih i iznemoglih osoba.

Uzimajući u obzir činjenicu da se u Centru nalazi najosjetljivija kategorija našeg stanovništva, Štab CZ poduzeo je brojne mjere kako bi se korisnici Centra na što bolji mogući način zaštitili od oboljenja koje uzrokuje virus COVID - 19.

Pravovremeno je osigurana zaštitna oprema, zaštitne maske i rukavice, kao i dezinfekcija cijelog prostora, a potom i kontejner za presvlačenje i dezinfekciju odjeće uposlenika. Uz konsultacije sa Štabom, uspostavljene su stroge procedure kretanja osoblja i korisnika, kako bi se što više smanjio direktni kontakt sa onima koji odlaze i dolaze u Centar, a time smanjila i mogućnost prenošenja virusa. Također, Štab je odredio i osobu koja je tokom 24 sata kontakt između Centra i Civilne zaštite, kako bi se osigurao stalni protok informacija i učinilo sve da se objekat i njegovi korisnici i uposlenici zaštite od koronavirusa.

Općinski načelnik Semir Efendić, zajedno sa potpredsjednicima Općinskog vijeća Elvisom Hodžićem i Jasminom Šaljićem, 30. aprila, posjetio je ovu ustanovu i za potrebe medicinskog osoblja uručio pet zaštitnih maski - vizira, koje besplatno za zdravstvene ustanove proizvodi novogradska firma "Dizart".





Kontejner za dezinfekciju odjeće uposlenika Gerontološkog centra

Gerontološkom centru u Nedžarićima, isporučen je kontejner za presvlačenje i dezinfekciju odjeće uposlenika, tako da svi uposlenici Centra prilikom svakog dolaska i odlaska s posla, mogu radnu odjeću ostaviti na jednoj od polica, koje se svakodnevno dezinficiraju. Time je uposlenicima omogućeno da prije ulaska i kontakta sa korisnicima obuku čistu i dezinficiranu opremu.

Uzimajući u obzir informacije iz Italije i Francuske, koje govore da su starački domovi najugroženija mjesta kada je u pitanju koronavirus, na ovaj način pokušava se Gerontološki centar zaštititi, jer su stare i iznemogle osobe sa već narušenim zdravljem najranjivija kategorija stanovništva.

U Gerontološkom centru, koji se nalazi na prostoru Novog Grada smješteno je oko 350 starih i iznemoglih osoba. Na sjednici Štaba civilne zaštite procijenjeno je da je potrebno izvršiti sve moguće mjere kako bi se taj objekat zaštitio. Također, ranije se ova ustanova Općini obratila zahtjevom za pomoć, jer su se, na neki način, osjećali ostavljenim od svih. Nisu imali organiziran prevoz za radnike i nisu tretirani kao zdravstvena ustanova, iako to u velikoj mjeri jesu. Stoga je civilna zaštita organizirala prevoz za uposlenike Gerontološkog centra, koji nemaju drugi način da dođu do posla.

2.000 zaštitnih maski i 6.500 pari rukavica ustanovama na području Novog Grada

Ekipe civilne zaštite Općine Novi Grad, 19.marta, podijelili su oko 6.500 pari zaštitnih rukavica, oko 2.000 zaštitnih maski, kao i dezinfekciona sredstva osnovnim i srednjim školama i drugim institucijama i ustanovama koje djeluju na području općine Novi Grad.

Zaštitna oprema uručena je Kantonalnoj javnoj ustanovi Gerontološki centar u Nedžarićima, ustanovi koja se brine o starim, hronično bolesnim, invalidnim, iznemoglim i drugim osobama starije životne dobi. Oprema je uručena i uposlenicima Zavoda za medicinu rada Kantona Sarajevo, zatim pripadnicima Oružanih snaga BiH u kasarni Rajlovac, kao i pripadnicima Odjeljenja za saobraćaj Policijske uprave "Novi Grad".

Ekipe Službe civilne zaštite obišle su sve osnovne i srednje škole na području općine Novi Grad, te im uručili zaštitni materijal kako bi se nastavnici i profesori koji svakodnevno online-nastavu provode iz školskih prostorija, te ostali zaposlenici, dodatno zaštitili od virusa.



Povjerenici u mjesnim zajednicama

Pored navedenog, u sklopu poduzimanja hitnih mjera zaštite starijih i bolesnih osoba, u svim mjesnim zajednicama na području općine Novi Grad uvedeni su povjerenici, koji su od 23.03.2020. godine, od 9 do 14 sati konstantno bili na telefonskoj vezi sa građanima koji su se javljali, te su prikupljali podatke o starim osobama kojima je pomoć potrebna. Zadatak povjerenika bio je i da prikupe spiskove sa imenima ljudi starijih od 65 godina i onih koji iz zdravstvenih razloga ne mogu izlaziti iz svojih kuća, kako bi im se mogla pružiti adekvatna pomoć.



Penzionerima podijeljeno 3.500 zaštitnih maski

Šestog aprila, građani stariji od 65 godina, prvi put su nakon petnaest dana boravka u svojim domovima, izašli po svoje penzije i u kupovinu neophodnih lijekova i drugih potrepština.

Većina ih je osim banaka i apoteka posjetila neke od tržnih centara, gdje su obavili kupovinu. Služba Civilne zaštite Općine Novi Grad putem povjerenika u mjesnim zajednicama, podijelila je oko 3.500 zaštitnih maski penzionerima koji su se tokom prijepodnevnih sati zatekli na Bulevaru branilaca Dobrinje, zatim na Alipašinom Polju u A i B fazi, kod TC na Otoci, te u Boljakovom i Buća Potoku.

To je još jedna u nizu mjera koje su provedene u cilju preveniranja širenja koronavirusa i zaštite zdravlja najosjetljivije kategorije stanovništva općine Novi Grad.



Volonteri i povjerenici CZ u akciji dezinficiranja najfrekventnijih lokacija

Više od stotinu volontera Civilne zaštite i povjerenika mjesnih zajednica općine Novi Grad Sarajevo, vršili su dezinfekciju najfrekventnijih lokacija i ulaza u objekte u naseljima širom Novog Grada.

Aktivnosti su provedene na prostoru svih 28 mjesnih zajednica, gdje je rađena dezinfekcija ulaza u prodajne objekte, institucije, apoteke, banke, zatim haustore i liftove u stambenim zgradama, kao i rukohvata, klupa za sjedenje i javnih površina kojima svakodnevno prođe veliki broj naših građana. Dezinficirano je više od stotinu haustora, policijske stanice, domovi zdravlja, ambulante i druge ustanove na području općine.

Dezinfekcija je rađena u kontinuitetu kako bi se prvobitno dezinficirane lokacije, nakon 48 sati ponovo dezinficirale, jer je sa takvim kontinuitetom vršenja dezinfekcije moguće postići najbolje mjere zaštite od širenja koronavirusa i zaštite zdravlja naših stanovnika.

Ova aktivnost, jedna je u nizu preventivnih mjera koje je Štab civilne zaštite Općine Novi Grad Sarajevo svakodnevno provodio sa ciljem smanjenja opasnosti od širenja zarazne bolesti COVID - 19, uzrokovane koronavirusom na području naše općine.

Ekipe Civilne zaštite i prije ovih aktivnosti radile su pranje i dezinfekciju saobraćajnica, trgova, šetnica, sportskih i dječijih igrališta, parkovskih i drugih javnih površina na široj teritoriji općine Novi Grad.

Urađena je i dezinfekcija šatora za trijažu pacijenata kod Doma zdravlja "Novi Grad" i Medicine rada na Otoci, te prostora ispred i oko ovih zdravstvenih ustanova, kao i Gerontološkog centra u Nedžarićima. Osim navedenog izvršena je i dezinfekcija svih vjerskih objekata na području naše općine.

Mjere koje se provode na poboljšanju higijensko-epidemiološke situacije na teritoriji općine Novi Grad bit će nastavljene sve dok traje opasnost od širenja zaraze.





Općina Novi Grad Sarajevo



*Svim muslimanima u Bosni i Hercegovini i dijaspori
upućujemo iskrene čestitke povodom nastupajućeg Bajrama*

Bajram Šerif Mubarek Olsun